

同
岑
集

同

岑

龔

十

二

卷

嘉	吳
業	興
堂	劉
刊	氏

序

同岑集者鐫吾郡同人之詩舉景純贈太真異苔同岑之句以名其集者也憶余病且五年得景純故址小構一室顏曰是山晨花夕月撚鬚抱膝得句往往在有意無意之際而遠近以詩教者積帙充案因與同學偶語若羅吾茗雪閒詩彙爲一集以寄臭味亦一快事夫詩自三百篇而下漢魏六朝三唐兩宋風調各殊體裁不一不暇遠引近如高楊張徐雄渾清越非雋永可味者歟一變而爲成弘臺閣之體懷麓首唱和者流易北地信陽洗發浣花之眉目非不居然卓絕也而正變雲擾譚者互有異同瑯琊厯下好古力學起而乘之而希聲

掠影者亦復充滿天下竟陵矯以清深幽眇迨其末流
不失之纖卽失之寂風騷之幟一予一奪如此總之靡
縟相師性靈掩抑求其直舉胸懷獨妙閒曠者幾人哉
吾湖素稱清遠人皆瀟澹迂烈孤情絕炤與山水相映
發其所投詩或數日而得一什焉或一日而得數編焉
大阮不器暨菊旃雲石輩不問寒暑爲之遴選詮次踰
年而集成清音亮節洵可歌而可咏也江雲隴樹不隔
相思對宇望衡猶存雅詠其閒縱出處雲泥而臭味自
同水乳寧無人焉各出性靈希景純之超逸追太真之
裁鑒者乎當世子雲必有知予言之不妄者是山石孀

李令哲撰

輯同岑六則

及爾臭味異苔同岑出世用世兩不相謀亦何郭生
之傾倒於温公也洵所謂交以淡成者歟此方戢影
於菰蘆彼則蜚聲於霄漢爰拏異藻獨羨鴻冥載攬
奇葩咸矜鳳翥但使韻諧金石何嫌跡判雲泥

卷分十二擬先老成人呂典型一郡乃瑤槭絡繹寓
目紛紜或韶英之篇什先投或者碩之詠歌晚擲況
復未邀警咳莫覲容儀縱欲約略歲年亦甚參錯難
稽矣隨到隨梓何軒何輕孰後孰先未聞桓酌駟那
遂遜邨鄘齊魏

自乙未秋剖劄伊始兩更裘葛幸告成勞詎意甫

錫琳瑯玉樓趨召者若而人旋披珠玉板屋羈栖者
又若而人痛人琴之永別悵形影之長離並載初編
忍忘夙雅

一郡已分七邑一邑之中環聚城市者十之一散處
村落山澤者十之九作者如林豈盡宿名之士不獨
丰神莫接抑且姓字未諳或珠盈萬斛錦錯千端原
不覺其有餘或光珍片羽味惜寸鬻未始見其不足
至於屢托郵筒轉加什襲我懷子情願安得攜手一
豁也母金玉爾音以寵嗣刻跂予望之

景行方來作賓斯邑棲山枕谷郡史誌之若乃陂門
餘不蚤招寓公於元始之年青笠綠簑筆牀茶竈往

來茗雪間自此不絕於今賢豪輻輳唱和聯翩誰煮
藜羹誰餐白石若非煙霞釣叟便是江湖散人敢借
寓賢以垂斯集

教外別傳不貴語言文字偶來茲土豈是買山到處
不卽不離知他是凡是聖雲閒自然散彩漫逐青黃
月迴曾不矜秋肯隨音響請看半滿總是全提偶爾
成文並無一字卽使去住莫定原自賓主歷然爰輯
斯編不遺方外

同岑集姓氏

一卷

嚴錫 歸安

吳世濟 歸安

嚴佳明 烏程

胡寧濂 歸安

張鶴 烏程

唐一庚 歸安

張世美 烏程

邵龍 歸安

張廷賓 烏程

邵律 歸安

韓昌箕 歸安

張廷憲 烏程

沈泓 德清

陳肇英 烏程

方大猷 烏程

沈應旦 德清

孫爾玄 歸安

沈鎔純 德清

沈胤培 歸安

沈象純 烏程

潘振 烏程

閔聲 烏程

臧熹如 長興

閔及申 烏程

沈諛 德清

錢元覺 歸安

潘嘉祉 安吉

二卷

陳謙 烏程

吳景凱 歸安

胡麒生 德清

陳元望 德清

唐達 德清

陳延厚 烏程

沈陶 德清

吳景旭 歸安

韋全祉 烏程

陶鑄 烏程

趙胥灝 安吉

姚軒之 長興

嚴有穀 烏程

蔣麟徵 長興

周鳳儀 烏程

錢元龍 歸安

張夢鼎 長興

姚延著 烏程

潘中臨 安吉

張嘉 歸安

鍾人鏡 歸安

俞潢 烏程

沈宋圻 歸安

三卷

徐陵 長興

嚴榮 歸安

茅元銘 歸安

姚延啟 烏程

吳法 孝豐

陳泓 烏程

同生氏

二

周 斌 長興

閔 涪 烏程

陳 萃 烏程

稽 旋 烏程

茅 固 歸安

陳 忱 烏程

閔 畢成 烏程

董 錫 烏程

唐 鏞 德清

吳 景先 歸安

董 漢策 烏程

吳 景雯 歸安

施 之圻 烏程

李 夏器 長興

四卷

徐 行 歸安

沈 彥章 烏程

金 鏡 長興

吳 允平 孝豐

孫 伯炎 歸安

丁 傳元 烏程

馮美玉 歸安

董說 烏程

凌宏禧 烏程

戴璉 烏程

韓玄起 歸安

錢价人 歸安

盧肇培 烏程

潘古琳 歸安

茅澂 歸安

茅士鑑 歸安

費煥 歸安

錢咳 歸安

唐靖 武康

李世賓 長興

費范 歸安

茅磨 歸安

高捷 烏程

姚景益 長興

李令哲 歸安

五卷

朱繼升 長興

張應纘 烏程

姚延服 烏程

嚴爾琮 歸安

唐元迪 烏程

張隴 歸安

沈祖孝 烏程

齊治 烏程

韋人龍 武康

章金牧 德清

吳楚 烏程

臧律 長興

溫春生 長興

凌義康 烏程

溫能夫 烏程

嚴願陵 歸安

嚴我斯 歸安

董靈預 烏程

施玉階 歸安

閔南仲 烏程

董衡 烏程

姚涪熙 歸安

丁 璵 長興

潘居貞 安吉

六卷

徐 倬 德清

錢元勸 歸安

沈隆卿 歸安

許 琪 烏程

張 漢 烏程

唐彥暉 烏程

王 召 烏程

凌森發 烏程

張 邁 烏程

戴 玫 烏程

沈懷心 武康

蔡詒來 德清

唐元樓 烏程

潘徵謙 烏程

姚涪敏 歸安

錢纘曾 歸安

茅 熙 歸安

臧 珏 長興

司生氏

四

凌景熙 烏程

潘佳鼎 烏程

韓師德 烏程

周原 烏程

茅必俊 歸安

臧辰 長興

唐深 歸安

吳筠 歸安

潘時升 安吉

七卷

韋人鳳 武康

吳閑 歸安

吳啟思 歸安

王端宗 烏程

嚴先珪 歸安

吳錡 烏程

李祜熙 歸安

韋甄 武康

金行遠 德清

李燭 歸安

費爾莊 烏程

李初燾 歸安

閔亥生 烏程

潘士弘 烏程

張鴻生 烏程

凌思黜 烏程

丁珪 長興

姚淳燾 烏程

臧基崧 長興

陸澂 烏程

凌秉均 烏程

沈爾燦 烏程

董聞京 烏程

張遇 烏程

吳鷺 烏程

韓純玉 歸安

八卷

翁燧 烏程

吳金昴 歸安

吳景鄴 歸安

胡啟佺 德清

臧正巒 長興

孫宵堂 德清

周知 德清

姚涪炤 歸安

吳光 歸安

唐鴻 烏程

嚴啟隆 烏程

張陟 歸安

唐彥敷 烏程

凌巖榘 烏程

胡景 長興

張夢明 長興

董渠城 烏程

閔旦綱 烏程

顧潛初 歸安

沈允阜 烏程

吳啟佑 歸安

吳洪 孝豐

姚廷芳 歸安

孫逢時 歸安

費埏 烏程

李樹森 長興

鄭康采 烏程

費均 歸安

吳映奎 歸安

凌容默 烏程

臧廷鑑 長興

陳豫 烏程

潘駿觀 安吉

周道仁 烏程

沈茗祥 德清

陳廷藻 烏程

張穎 歸安

李天策 長興

九卷

沈峙 烏程

費景焯 烏程

施清 歸安

沈爾煥 烏程

吳磐 歸安

唐大為 歸安

閔祖開 烏程

姚澂 烏程

許瑛 烏程

張瞻 德清

陳驥 烏程

潘汝慧 歸安

楊宏 烏程

費圻廣 烏程

王儼思 孝豐

凌宗詰 烏程

姚琴 長興

王錫申 烏程

凌以逸 歸安

沈鍾堯 歸安

韓祇德 烏程

鮑耿 烏程

沈頰 烏程

邱衡 德清

吳繡 烏程

朱心 歸安

嚴有德 歸安

許延邵 武康

馮遵祖 歸安

陳瑗 歸安

潘文輔 歸安

王祚升 長興

王祚振 長興

温 佶 烏程

朱 存 烏程

蔡四輔 烏程

胡公允 歸安

陳奕傳 烏程

沈 鏐 歸安

陳之彪 歸安

董 樵 烏程

陳後方 德清

陳奕表 烏程

楊 度 歸安

李體鎔 長興

十卷

張道岸 烏程

汪 霖 歸安

吳國章 歸安

嚴 整 烏程

施星房 歸安

李元烜 歸安

施模 烏程

陳子英 烏程

楊啟明 歸安

吳景奩 歸安

潘廣福 歸安

顧元鎧 烏程

沈光胤 烏程

袁雲上 烏程

凌文然 烏程

陸象言 歸安

蔣英 長興

沈唐晉 武康

金漸皋 德清

姚澶起 歸安

錢志熙 歸安

董耒 烏程

臧封 長興

沈曦卿 歸安

蔣苑 烏程

張安絃 烏程

丁珮 長興

韓麟德 烏程

沈迨 德清

吳肩燠 歸安

沈暉 烏程

李焜 歸安

郁公啟 歸安

尹任 歸安

陳奕馨 烏程

溫重華 烏程

戴黻 烏程

嚴肩肇 烏程

尹四維 歸安

王慄 孝豐

俞雋 烏程

凌一飛 歸安

潘開第 歸安

茅栻 歸安

蔣明鳳 長興

朱佐 烏程

李祜燕 歸安

同岑集姓氏

寓公

呂潛 四川

郭奎先 四川

顏俊彥 桐鄉

潘立勳 真定

徐寶挾 華亭

魏畊 慈谿

欽亶 長洲

呂泌 四川

魏景禎 慈谿

程尙 休寧

張肩 吳江

李世俊 錢唐

沈捷 錢唐

沈虬 吳江

錢燦 紹興

錢本寧 桐鄉

沈嘉詒 錢唐

陳量 桐鄉

皇甫欽

吳江

劉璽

西安

于鑾

金壇

潘葉蘅

慈谿

陳世禎

仁和

繆徵尹

仁和

馮翼薇

慈谿

胡鵬圖

江西

潘爾夔

吳江

于世華

秀水

卓天寅

仁和

沈肩昌

慈谿

同岑集姓氏

方外

道恣

道峰

通琇

報恩

弘璐

雙髻峰

通隱

行岳

報恩

正晝

桃塢

海源

道峰

路嶺

道峰

本行

道峰

覺印

本儂

道峰

淨鐙

能仁

寂仁

海行

普潤

蘇山

通蔭

行泐

演教

智源

寂桂 蘇山

淨斯 龍華

淨慧 龍華

淨周 龍華

濟圓

淨侶 資福

行廣 資福

本堅 鴻禧

行學 正覺

淨體 龍華

行鑒 飛英

性月 道峰

行雪 道峰

海蓮

僧慕 道峰

宗組

成學

達乘

智琪

智水

德心

德輿

超坤

顯慧

眞常

德器

等觀

明起

資福

海濟

智教

同岑初集卷一

吳興叢書

雒城李夏器不器輯

茗東沈 頰穉岌參

巖

錫

充涵

擬古

人命若朝露難抵旭日光涼風悴林木秋氣凋蘭芳宿
莽在中洲獨能歷嚴霜天道苟與善禍福何茫茫

孫子長學憲輯天目兩山誌成有贈

不爲尋幽賞懸知重討論西湖何派衍南渡幾山新弔
古興亡劇公餘翰墨親只將琴鶴意玄對水雲津

吳世濟

輯侯

題費仲開松林圖

萬樹蒼松小結椽拋書屈腳日中眠黑甜穩處華胥夢
淝水風聲那許傳

帶溼枝枝滿突煙濁醪不少杖頭錢茯苓斗大蒸成餅
猶有松梢露可研

巖佳明

感遇

感懷

秋風振鷗鷺日與我同游蔽蔽香且潔聊以薦晨羞昔
聞鷺與鶴自貴不妄投高翔寥廓外與道相周流神仙
不可遇天路空悠悠何如收玉羽且同凡鳥儔佳山千
萬歲白雲無時休

戲持一竿竹驅石爲羣羊散走草樹內離離不成行揮
肱乃畢至多歧無所亡欲臥還爲石青莎被嚴霜物偶
自變化吾懷聊與忘一笑子卿節徒零遼海旁

故鄉有殘月卻到客中明曉風吹不轉無以寄歸情春
水江湖闊客夢愁難越記得別家時花落悲嘯鳩客老
花又開還作幾年別

山居

嵐氣疊成屏落日當西壁江邊沙漱紅雲裏人家白
每飯斲枯桐以供竈下熱夜半北風生柴門擁殘葉
夜寒窗紙白魂搖如泛梗開窗月便來窗牀臥松影
丹霞生峰頂明月出澗底倒浸芙蓉花從天落秋水

胡寧濂

君寧

雁字

雄飛壯志幾時休此日遨翔第一流
宛在中央天若繪依然雲表弋何收
然犀貝錯潭心現瘞鶴貞珉水面浮
肯似鳧鷖無氣骨風波出沒任潮頭

張

鶴

冠日

和孫孟樸別兒詩

驚看石理迸紅絲黼黻文章在盛時
玉筍成班推國表蘭芽初茁稱家兒
我歌我笑前朝史君作君刪本事詩
斷敕生男拌學嫁懊儂也自被人嗤

唐一庚

日三

郡盟耆英九十者一人八十七者各數人思欲
附之慨然成詠

人世同逝波百感生遲暮維昔少壯時愧悔類紈袴不
甚惜居諸無計緩朝露肝腸化爲茶頭顱皓如鷺搜集
諸耆英篤老期良晤耄耋止一人耆耄尙棋布又不任
龍鍾相過俱捷步念之爲欣然遂欲綴其數小齒廁大
年若得松喬附因思前亂離辭世如脫兔途絕雞皮翁
室鮮僂背嫗諸叟從何來飄飄矜杖屨雖爲碩果存而
豈盡天賦能辭苦濁侵乃深靜者趣流離性自恬兵凶
體猶素忍辱受俗滓延生俟世寤鶴髮一羣游或作神

仙遇

家畜伏雌得六雛一夜狸啗俱盡

國仁獸不噬維家則亦然主人無祥風字畜失其天昨夜夜分節忽然雞遭孽奮翼若格鬪漸聽聲細竭促婢起燭之大者項已折諸雛絕音塵氣哽面通熱惋鬱未能散便欲張機振捕之以爲羹庶使雞仇雪豺狼肆縱橫狐狸竊吞齧天道何茫茫雷霆亦泯滅又思漏吞舟鼠輩何屑屑飢兵方雲來弱肉憂更切低頭付長歎漫補殘籠缺

張世美

滌凡

碧湖晚酌

俱迴文

愁題舊葉紅浮水醉暈新楓晚帶霞游客幾回驚鶴唳

秋雲片影落帆斜

春日

花含宿露迷狂蝶
柳拂輕煙凝靜風
霞落映桃千嶂錦
月明空谷滿林風

涼生

涼生簟枕敲眠晝
暑逼冰壺玉沁寒
香送藕花風細細
白搖扇影月團團

邵

龍澹岑

諾和尙過訪

山高木葉響天風
門掩荒寒松菊中
不是遠公誰剝啄
衲衣攜手看霜紅

門庭蕭瑟學安禪石火鐺中煮野泉問我孤懷何所似
一池寒月浸枯蓮

張廷賓

季賓

贈包涵虛

惟君高世意不厭客來煩坐我新花下時傾舊酒樽山
寒雲護寺水放月明村自識春風面無勞呼應門

宿淮遇下第諸公

故國層山遠淮河一水深風吹長捷足月照未歸心野
店楊花落斜橋燕子音同舟三十六都半洛陽吟
浙米逢春汐簷鐙響夜船夢魂皆望曉出處不同年人
挾餘香色笥藏褪表箋故人不可問小雨半垂簾

歸茗

回橋支港叩墮門還許湖州有弟昆十里碧苔天在岸
一溪明月水依村比鄰問訊新行履老僕相扶舊酒樽
尙得居山無恙在素琴聊復破黃昏

六旬寄三兄

作起新歡解舊醒夢回六十笑餘生旣貧不復愁離亂
未死猶能見太平已識山花開滿路漸聞嘯鳥報殘更
明朝把酒放船去自誦春詩訪阿兄

留壻沈揆升家旬日出詩告別

中郎何事女爲郎況有方干詩句長季筍繞塍羹可點
薇花飄雨豈生香事從閒話增忉怛人到衰年益感傷

留我非無十日好老夫終是念家鄉

北兵駐牧維揚號王子者供帳甚盛作懷古詩

帝子秦宮接楚丘後庭花唱古揚州關門日鎖隋堤柳
汴水東行不肯流

邵

律

攝山

過皎然遺址

拄杖拖雲點磴斑寄游聊亦上禪關到來野鳥愁空雨
無數松風弔昔顏故事只今惟石枕感時終古一瑤山
西林夜月寧無恙猶憶寒花笑未還

美人展畫

閒攜玉軸引雙鬟遮莫煙雲萬里閒昨夜三更巫峽夢

依稀一座米家山

韓昌箕

仲弓

曹仍麓惠余酒米米匱以酒易米感歎久之

賢愚雖異等飢飽應無二所以晉淵明乞食無嫌避嗟
彼雖拙詞主人能解意豈惟多贈遺傾觴還極醉子匪
陶公才乃有陶公累何期老友曹斗粟見雙饋佐之以
樽酒命飲使熟寐陶也矢冥報子能無慚愧攜粟與樽
歸欣得非所冀兩日粟已空八口攢相企念惟樽尙存
沽之易糗糲自歎不及陶卽此相懸跂麴蘖旣無緣何
如戒杯觶

虛白道人爲余寫老梅瘦石圖失之二十年忽於

駮度姪齋頭見之率成短歌

高士山中冒雪來支離斜倚石崔巍韻冷心貞骨且傲
予挹其香肅其貌乃求妙手託素毫虛白道人來相遭
搖筆運腕精神出高士儼然入我室相對無言鄙吝消
道義之交期久要何意兵戈中間隔有如流落他鄉客
一朝重遇笑顏開展玩咨嗟更可哀人生聚散亦如此
達者視之良已矣

送李小有

堪嗟道喪莫彈冠交籍凋零閱已殘屈指年華驚老少
撫心家國強悲歡爲期後日逢非易愈惜今朝別更難
此去一江秋水隔停雲落月思漫漫

喜于御君至

時危無復問平安
滿眼風波去住難
江上青山聊自隱
鬢邊白雪兩相看
百年空抱王孫餓
一見誰憐范叔寒
今日逢君如隔世
樽前細語盡悲歡

張廷憲

四心

一子

一子不多戀亦非
竟弗顧安保盡素心
餘年隨人度記
得龍溪語目前止一步

遲諸廣文苦雨長短句

廣文先生寒徹骨
寒食相邀桃李窟
三日禁煙寒氣鬱
勃南山有雷殷殷
不肯歇詰朝約取
在虞淵爲我語風

伯掣去陰雲晴光發越一傾三百杯醉後大言伊輩雄
杰無端相困蕭蕭髮挹兕觥酬老蒼老蒼悶然領首曰
余該從罰補汝老壽不爲屈

思季賓弟時季方注李長者華嚴論

尺五山前地于今月再初朝昏思一見爾我正相如不
策支離步安窺長者書恨茲凝道力日落竟躊躕

沈

泓

弘源

贈清水庵明公

禪寂問何處多應住澗西是經皆廢紙無壁可留泥賣
藥還尋草爲農復抱犁衲衣嘗自補愛爾樂雲棲

捲簾

湘竹作朱簾煙光時若結白雲自往還去天不容髮

送達上人之徑出

一著僧衣百慮忘閉門深坐掩胡牀春寒二月花爲雨
消受溪山舊草堂

陳肇英

止宜

窮途失路之人五十九而生子命之曰來遲

嗟汝來何遲累深已難支行年陡屆耆往事概如斯田
園慳二伯僮僕愁三四黃馘老澗槃青甌離榻次一寒
已沁骨殃厄且迸至少年日怡牀老夫盡瘁茲竊歎靡
草秋雕萎應若榴豈期枯楊枝欲孳不擇時更嗟失路
人骨肉多離斃種瓜子半摘插秧禾未穡前汝七舉雄

三殤一歿折存者歲參差方愁釜不熟汝來豈無因何
不先一匣鐙銷人散後主倦應懟客客至不可期樽空
難再設若云責逋來汝看井中渫

爾揚姪初度以酒命予憶坡公贈友之句

嗟我與君同甲子五十九年窮不死君休文戰我在田
兩人心事同一止回頭憶得十年前一止再止今如此
揚不在先止不後宣尼應許爲知恥謝豹化蟲足覆面
吾今齒馬手掩背布衾未穩五更眠褐衣猶慮三加褫
惟茲片晷幸陶然杯酒澆胸口一哆

上路山齋答臧敷青贈韻

寥落秋風幸地偏寤言猶捧碩人篇餌貪幸未師魚鳥

蕨詠猶將被管絃
壇石無堅礮者是叢花有馥綻爲先
送君歸去歌南浦
霸業墳頭鹿尙眠

方大猷

膺升

祝征西將士

生來射獵慣乘馭
吹徧春原夜月笳
燕趙少年甘許國
嫖姚老將肯成家
旗懸太白雲端掣
鼓倩豐隆天半搗
七載楊么三十萬
會教八日化蟲沙

登泰山

勿驚匹練見姑蘇
帶華連衡未足迂
俯去直將埋地盡
敲時端欲倩雲扶
小煩瘞玉來天子
遠薄封松列大夫
從此登臨空宇內
十年塵冑一朝驅

抹畫人間小洞天峰峰色鬪蒼妍不緣呼吸能通帝
何自雩封欲望仙水絡珠簾春雨後馬迴丹嶺曉雲邊
臥游試問藏圖者得似扶筇好日□

歸興

丁家寨下大河流十四年前登此樓人面桃花芳訊杳
宦情蕉葉夢魂收聽殘賊浪羣峰夕閱盡浮雲萬籟秋
回首更無縈念處江南游子望揚州

沈應旦

方平

九日眺乾元山

老山若高士羣從當鬚眉娟秀在神理區區臺榭爲杪
秋百無事人與山更宜歡然兩弟姪不期相肩隨理策

僅咫尺武蜿蜒山之隈木葉下種種女貞子纍纍靜質耐
紅紫安容俗手施林觀氣微溼振衣千仞危溪腰折如
字城甕手可規遙青數重出百里猶透遲家人舁籃至
斗酒搖濁泥野火炊菰米白日冷蹲鴟聊以竟游力豈
爲飲食卑長弔織簾士捫蘚讀荒碑呼之不可出高意
良在茲

題扇頭美人照水

碧落吹異香芬華何蘂蘂玲瓏金步搖翠袖如雲靡豈
能籍人閒綽約溯流水抱琴不可彈恐泣鮫人起須臾
清風至漣漪出仙姊妙質竟比倫衣裳渾欲爾美人發
微妒巧笑佯作喜步窄勢已前相去尺有咫展然神影

合一照無彼此白雲彌蒼波旋障彼姝子獨立何停停
絕代方足恃此意含無窮嬌癡不容擬誰能發祕心寫
入懷袖裏

古金蓮庵品泉

好山何必深所深在林麓空桑鳴春蟲細草織如縠興
狎展齒柔氣融游袂馥延袤數武閒疏籬出茆屋此屋
無簷牙四圍但修竹亭午露尙冷膚寸雲爲族老僧八
旬逾視履猶粥粥瓶湯頗白香三嗽通旨蓄問水所從
來引我照泉谷泉根不知處泉罅不盈掬飲者恆於斯
挈挈如轉轆選名稱金蓮曾向梵書讀余笑謂老僧貴
豈名所錄眾歆我亦咀神理不相鬻猶媿呼吸浮未能

愜幽獨還攜襪被來與子謀信宿龕對古先生團蕉雙
瞑目夜半起經行煮泉或當熟更無多品題聽松風謾
謾

宿以日弟西齋

躑躅愁無寄荒齋入暮探避人宜小飲憐我莫深談短
燭寒猶耐茆牀穩亦堪木樨花已落微有夜香含

放生庵

結室不盈咫全依竹色深宛然具丘壑忽自改晴陰石
有聽經耳魚無報德心玄真尙多事幸爾只蹏泔

病中

藥可呼兒覓花仍隔檻開但留雙眼在復遣百愁灰便

作頑仙得誰貪老健來莫教扶杖出種種不堪哉

城居漫興

渾無怪事可書空公道春風委巷同欲自誇詩央老嫗
問誰貽酒諱鄰翁樓虛嫩月生眉處人淡清溪倒影中
應笑鑿坏猶未穩蓬蒿一徑女牆東

與仲永言懷

和樂宜兄老更憐憑陵只合在詩篇漫將高隱文吾賤
直到奇窮媿汝賢何似小山曾歷宦卻依輞水愛逃禪
而今把酒誰先醉仍向羲皇作比肩

讀峨翁先生初夏詩倚韻

春風昨夜已無多幽谷其如黃鳥何人自十年悲汗漫

天仍四月養清和重游不是桃花客已逝空傳麥秀歌
未許樵青誇賜典儘容官笠荷漁蓑

蔡吉人書屋

好山供奉讀書堂繞郭支簷面面當簾控坐移官閣影
牀虛眠帶女蘿香花無幾曲仍雞犬竹有千竿自鳳凰
何處炎歊何處雨綠天長浸翠微廊

社集詩步方虎韻

同人風采自妍和未許橫吹雜佩珂古字乍經蒼史勒
新篇應付雪兒歌當杯莫袖紅螯手把釣長寒白鷺蓑
石爛大荒猶可鍊牛衣數問夜如何

公業眉山別業

秋山解意抱門斜，卻到門看一水涯。
老病入林窺棗栗，清饑倚檻問魚蝦。
田應減秫留秔種，書漸臨蘇入米家。
欲叩平安惟有竹，寧論他事復如麻。

寇至弘源姪婦殉水詩以哀之

夫子長貧歲復荒，嫁時裙布已凋傷。
甘泉烽火忽連夕，矮屋糟糠肯下堂。
願以素絲貞苦節，誰爲黃絹寫幽芳。
牆東野老吞聲處，晚眺衡門一水香。

學畫漫題

茗雪溪邊擺畫船，無多粉本百千錢。
怪來眼底真山出，抹卻王維舊輞川。

孫珥玄

君斐

題金陵故宮舊香

金掌淒風泣銅壺曙色愁
淩煙輪往烈收燼失今謀
蕪芷歸湘客椒蘭覓故侯
三秋誰復采炙手誤薰猶

挽陸大行鯤庭

江上飛沙隕玉芝兩京連陷浙城危
驚聞雨泣降王壁卻誦霜淒斷岳碑
三窟有人延石勒一抔無樹接要離
更誰爲纂弘光錄淚拾行人絕命辭

沈鎔純

孺一

感悼

夜來鍼巧指纖纖仕女傳看意未厭
自入貧家病龜手繡窗花譜未曾拈

沈肩培

君厚

不器李郎納姬長安投贈索醉

燕市春深午夢驚何來玉女步盈盈漢臯珠佩尋常事
悔卻從前賦定情

冥冥雨洗三春暮怯怯風搖四月天不信芙蓉開此日
御溝柳下一枝鮮

李郎自納姬後無從半面同木叔嘲之

到得妝成日欲斜毵毵鬆鬢學堆鴉釵梁壓處多斟酌
不覺低飛鏡裏花

半是嬌癡半是醺凭闌不解石榴裙幾回夢嚙頻呼醒
只恐飛空散作雲

沈象純 太白

春暮

時猶撫牀而
賤降適及

一枕託煙雲音塵靜不聞長貧無負郭多病怯談文夢
與禽魚適思隨鹿豕羣忽然驚歲月已及暮春分
我已耽牀久猶能問舊顏疑玄疑白際一壑一丘閒馬
齒依然長鶯花對日閒春風幸尙及雅志在高山

秋暮偕弘載弟入山輿中作

步怯轉依肩殘曛照亦妍禾黃層潑浪松翠老摩天磊
石圯猶穩空山斷復連隔溪尋古寺不覺晚峰前

潘

振

藻生

硯田

長說貧儒仗研豐田堪作硯筆耕工桔槔不復瞻雲北
杼軸寧憂賦大東地接太湖無瘠土農連比屋盡堪封
新禾萬井秋來翠白黍黃雞處處同

競誇稅產費多金總是貪癡減道心但祝篝車能滿願
已登穀玉定開襟呼雞添得朝來粟飽鶴新看子在陰
不似顏公會乞米秫田多熟釀堪斟

坐玉柱峰下

羣仙鋸石削方屏留得瑤林一片青豈屑玲瓏供几案
獨凌杳靄入蒼冥點頭欲解生公法望氣渾侵漢使星
峰頂吹笙元不少松杉影裏竚雲駢

賦得人日題詩寄草堂

春來人日最關情七種辛盤取次生
入夜雨聲纔浙瀝到窗曙色弄空明
參星在戶占鐙放街鼓猶聞達旦鳴
獨坐草堂吟未就梅花無賴太縱橫

登半郭樓得秋字

撥悶無如上小樓煙林一帶逗新秋
才經七夕天河到又見雙星白露流
下榻蓬蒿開蔣徑結廬人境待羊求
據梧高咏銷長日誰破蒼苔伴我幽

祝閨樓成寄右安家仲

百年難遇兩端陽疊際龍分肇未央
霜鬢如絲凡六六蒲卮爲壽恰雙雙
堂開祝閨南薰爽地接觀濠北郭涼
自是登樓饒作賦更因春草夢池塘

閔聲駿有

築室偶成

翦草搆數椽僅可蔽風雨苔色印空階柳陰覆蒼渚棄
彼高岡松拾此井上李綠疇好風來披襟聊容與蕭然
一枝棲優游甘沒齒好鳥能知音名花稱解語疇爲忘
形交大兒孔文舉

初度偶作

青鏡羞眉宇黃金笑劒華心驚忙日月眼看舊煙霞衣
薄蘆爲絮霜清樹不花請攜元亮酒同種邵平瓜

只合居山好

只合居山好幽棲夢亦狂掬泉聊當酒煮石以爲糧衣

薄朝曦暖寒深草簟香開扉無客到落葉在藤牀

幽憤

百城南面坐難安青眼休將世事看花鳥多情驚劍鏢
文章有命付毫端宮中原不崇高髻野外于今盡鷓冠
閒向山中翻味譜羞令薇蕨佐清餐

美人撫琴圖

蕉陰初度曲聲新爲愛清風不起塵莫笑相如絃上冷
聽琴今作撫琴人

臧熹如

文蔚

猶子對四十臣虎先生錫之名篇因書簡末

祖德日以遠誰復秉禮義之子素心人不爲軒冕累執

雌善持下守默葆天倪四十希不惑反照同然犀吾聞
呂真人功在存神耳滴滴似珠貫縣縣若流水調息得
歸根潛飛豈易處倘能學向平放腳五嶽去

春霽

風止復生雨不知春日和況於滯疾人拏斂尤苦多朝
來聽鶯語琅琅向南柯啟戶還四望輕雲歸山阿山山
如刷黛百里若星羅天空日色正魚戲水微波新綠澹
眉宇筋骨良傿傿豈云已捐俗真氣豁沈疴

過法華寺贈廓游

策杖攜□侶重尋白雀期到門山似削入座徑偏夷客
舍峨眉子僧來雁宕師天台有真境還笑石公癡

送余君卜還江州

結交卑薄俗然諾輕黃金分手非無淚應懷壯士心

鄭超宗招麗人黎倩鐙集同賦邗江鐙詞

鐙火邗關帶夕陽女郎結伴鬪新妝數聲落雁留君住
莫使輕裘著曉霜

火樹銀花徹曉天家家歌舞度年年莫嫌久客囊如洗
尚有纏頭錦十千

苦雨

春雨緜緜春草滑回溪激石聲相薄山深竹密密到稀
巖畔梅花自開落

閔及申

生甫

凌子淵聲攜詩見示追念尊人茗柯感慰兼懷用
題簡末

弱齡從吾兄俯仰三十年音容儼可卽把袂永無緣夫
君鍾特秀澄思靜于淵惠焉肯顧我芳韻藹幽蘭標義
乃孤絕會心希淡先貽我一編詩泠泠深夜絃時風競
妖嬈何人儀古顏期君敦夙尙撫卷涕潛然

西湖泣柳

湖光咫尺堪愁絕竝望煙波花似雪枝枝柳色想當年
有客孤懷獨泫然畫船簫鼓彼一日塵飛沙冥茲安極
濯濯風姿自不禁銅駝紫陌應難識歲序崢嶸不可親
榛莽盈途秋復春青疇白石便今古好去蒼茫莫問津

只合山居好

只合山居好崔巍亦可耕雲根分乙乙風暝布庚庚譜
穡終年月觀時養性情濁醪聊共夕里曲和田更

醉芙蓉

古渡微波際遙原夕照時淺深霞共媚遠近露含姿瘦
綠如相倚酣紅不禁吹那堪回首望浦月寄涼思

冬青花

皚皚飛花照冰雪虬根屈曲棲孤魄碧魂夜半繞荒丘
蟄龍乍醒寒厓裂一片兩片寥天月點點滴滴貞士血
篝鐙訪玉砂磧中鬼火青熒伴行跡朔風慘淡霧蒼茫
冬青凋實無人識吁嗟乎秦淮之南趙之北觀闕崔嵬

峙白日黃塵漠漠覆三山舉世誰能尋禹穴

竹枝詞

竹枝江湖之謳吟也楊鐵仙輩假以寫豔思余有深
悲蓄之數年而不忍涉筆偶拈此題用替泣血牢落
無次雜寓所懷他日畸士庶知余心

凌茗柯

浮玉遺蹤忍更尋西泠渡口古祠深秋風千騎胡笳鬧
寂歷斜陽罩柳陰

劉念臺

孤心獨往采薇歌蓴菜雖甘奈若何鐵石平生終古勁

寒風烈烈嶺峩峩

北騎渡西陵
不食數日死

朱未孩張玉笥

一酌寒流慟古祠幽懷千載激貞期文山再世何人弔
黯淡蘭江寄暮思

李懋明萬吉人揭萬年

扁舟破浪溯桐陽突兀高標白鷺岡慚媿南州數君子

分持生死繫興亡

白鷺岡吉州
講學之所

黃石齋金正希溫寶忠

桐君石壁倚天高鑿鑿危湍不受篙一棹新安五百里

忠魂淅瀝怒商颿

三公死
事新安

徐九一

涼波淼淼石湖湄短髮長纓媿此時天祿髯仙難再覩

一船明月侶冰夷

乙酉秋自沈石湖

沈 謏

著椒

乙未漫興

家世本農家東臯穡事加逢年屬天幸得歲不求奢
鰲黑諧田叟殷闐聽狹邪空疏非自分吾志在雲霞
天問窅何如無才且校書病如天假我懶或世忘余結
撰酬家學勤勞補逸居一人知不恨莫似仲翔歟

求友

人生有微尙況復在明夷吾自愛吾鼎人言守若雌
短長處士橫得失志林欺惟爾知予者空齋梅影敲

卽山草堂

入山恐不深深山閉門是版屋閒短垣古之石戶氏

林次厓

交南郡縣武功揚小吏欽舟組繫長國論懷安忘遠略
中原冠帶結椎鄉

朱秋厓

溟海揚波島寇來朱門囊橐暗胚胎禁巖市舶鯨鯢靜
廷尉山頭絕命哀

曾石塘

朔方河外受降城牧馬長驅禹甸驚三駕埽除如帶奠
王師未出獄先成

三公多有言其失策者然林止罷官
朱猶自鳩而曾竟死西市于公所謂

一腔熱血灑
向何地也

錢元覺

悟卿

結客少年場

翩翩游冶子白馬出長楸寶雕金勒鞍雙帶佩兩鉤春
明桃李開香風滿道正朝登平原津暮宿南陌頭燕姬
爲我笑胡雛爲我愁挾彈彈黃雀黃雀聲啾啾微物尙
銜恩何況君子儔出門別妻子慷慨談封侯絲來七尺
輕杯酒仇庸流退讓吳季札敢往魯仲由要當拯斯民
何用身家謀盜跖居人閒恥爲朱郭羞

烏棲曲

瞳瞳光照紅綠絲是妾瀉水朝妝時玉鋪翠幌搖靨面
輕綃長袖從風便

宛轉橋通轆轤井銀瓶汲水愁素綆相思相寄數行書
江漢迢迢雙鯉魚

勵志詩

時不我與日月其馳攬衣晨興恂焉深思鶉鳥忽徂商
颯旋吹感物靡恆使我心悲昊天不忒如作之則月盈
而虧晷午必昃爛漫爲章經緯成織匪可坐須胡不力
飭先民有言毋縱厥志嬉逸業荒怠忽行墜砂礫蒙金
稗莠亂穗雖有良駒自失其轡義爲大路仁爲安宅鴛
怯不前裹足自畫慎選爾術益弘爾責蒲柳春姿後凋
松柏梓慶鑠削視驚鬼神痾僕承掇榘株其身小道尙
爾矧伊經綸再磨再琢以陶以甄雷可穿石繩爲木鋸

同
一
範我馳驅鞭後善慮飽德醉酒嘉謨廣譽暮四朝三名
實虧狙行者常至爲者常成方剛之力實畏後生四十
五十不立修名籟兮籟兮殞此秋聲

擬古

巢鳥有還翼逝水靡停期踟躕萬里心杳杳車行時遵
彼道路歧緩帶縈雙垂馬嘶方悲愴蟬鳴更參差深閨
懷明璫顧影知憐誰君行如飄風妾心如素絲飄風那
可極素絲終自持何以慰微末夢魂常旅羈

采松花叟

前山何委蛇冠山何軒翥兩山夾磴盤一徑入幽去千
株復萬株松花黃滿樹有叟杖蹒蹒攜籃掇花露曬粉

□爲精蒸糕勝飴舖朝暮任樞茹山靈不徵賦春綻紅
桃繁秋霜飽寒蘋口腹得充怡官府無深懼嘉哉老叟
言令我生欣慕了古賢達觀引養在恬素山叟行去人
松風動迴處

寄盧止椒松滋

豎儒喪垂翮誰復憐奧博艱澀短胸氣妻奴舉稱惡有
僕力驅馳有媛殫紡絡日稽月核程作苦彌淒約華澤
一朝承感往今生乍景意亮非誣高明洞籌度故劒不
深求愁眉慘空閣翼翼舊侁愚聞瘡抱怒索疇昔厚風
俗咤悼吳趨薄親睽竟濡遲朋好將遼廓君情允肫肫
余言倘諤諤肉食恆鄙人取裁在藜藿

春游古意

野色春游好天桃亂水西光風吹去緩暖草坐來低寶
玦并州客高樓蕩子妻柳條頻繫馬塵起半香泥

草閣爲冠日主人賦

荒畔一弓地寒蕭空爾思雨多春草亂晴發柳絲垂北
郭沈煙杵南山足羽儀風波時可過漂泊夜深疑

桑苧園

苧翁遁跡少城阿鈴鐸聲寒愴遠多老鶴圯巢深寺鎖
荒臺秋草夕陽過閒棲不自嫌趨走負褐真能動浩歌
苦憶昔人傷感處浪傳南國有嘉禾

下菰城

黃歇當年身易主至今封邑有餘榮
繡圍寒谷唳空鳥樹繞濃煙溼
古城雲物依然似楚國江山何處著朱英
可憐珠履紛紜者誰爲春申一劍橫

寄沈天股

子房狀貌空好女泗水悠悠誰復情
時對西風悲尺鐵每爲衰寢泣長庚
黯然吾道寒無色卓爾雲山臘放晴
心事未酬恂悅去橘鄉留局待昇平

登城東大悲閣

作客都無與世情入雲高閣迴爲盟
萬家浮甕暮煙合一目到荒衰草平
素練裊風開別墅藻川橫日漾孤城
攬衣淅瀝峭寒迫四顧塊然勞我生

送韋劔威閩游

別路知何許秋風思鬱然離歌聲正發黃葉墮樽前
落日盛寒色空山號夜除猶堪納屣不上說秦書

潘嘉祉

右安

冬日課蒔菜

孟冬寒氣至草木歸其壤隕穽成閉塞霖霖亦云養種
蔬時非後及此土膏泆帶雨欣荷鋤濁醪我童獎蕃息
雖白天糞治人工仰東坡固瘠地東臯乃隔港況此十
年荒地力尤自養晚看菜根疏曉看菜甲長鄰翁向我
笑場圃豈易傲吾自解吾意葵藿無難享

秋懷擬古

淒雁橫水天萬里作冥秋愁人迷相思直視孤煙浮忽
逢同心友豁以清白眸識曲聽其真回嘯風颼颼長桑
曉洞視五臟無全牛肝膽不楚越絺綌亦衾稠霜淨天
地古氣肅山河迢方朔稱歲星無乃適來投談笑倏然
散黃濤禾黍稠

若輩何喧喧我懷何漫漫信陵空涵飲武侯詎能飯學
堂日無事翻書聊肆歎茫茫強出門草滿不能剗還歸
閱文史文史愈漫漶陳跡渺自靈耕莘聊共勸秋菰莽
若牽秋芹竟誰獻丈夫意何在乃在秋風怨

看鍊鋤銚歌

城南勸耕無魯公火獵只向山頭紅虹蛻落空燎原野

若雲非雲排西東村邊老翁爲余說中男從軍五年別
脫鋤買刀出外郊割盡穗芒水草絕余歎謂翁此不然
輿人每每誦原田五兵害重五穀死土物能令生氣全
黃中通理自合漠土德金功有閒作黑氣清風蕩漸消
一易再易無磽惡由來鼎氣莫虛歎范金厝火會堅牢
丁丁嗑嗑鋤野蒿擊壤未教土著逃輟耕歎息亦奇豪
勿信秦人阮翁仲鑄金纔得鎮臨洮

讀庾開府千年水未清一代人先改有述

征馬噪金珂嫖姚滯隔河文章南渡少書奏北歸多煙
霧客如寄風塵主在羅與君如昨日海燕叫嘗過
何事怨清樽驅車望國門機忘千日泮情至一時煩白

日行天速黃河徹地渾昔年掩袂處原不俟多言

和雪帷師來韻并申短願

及爾娛遲暮棲棲亦可栖楓丹雲未暗月小岸能低摩
詰遺前宅香山紀舊題從來會解脫此度敢重迷

古意

憶昔雙鬢日初窺百尺樓嘗嗤張博望還倚富平侯地
沃魚爲菜山芳桂作標告身總乘傳腐子盡衣緞椰葉
四荒護梅花五嶺留明珠尉佗國翠羽夜郎洲君父恩
勝海年華美若榴豈知盛易歇偏覺樂增憂莫趁劉琨
笛難修傳說舟文章寧取副京國竟如郵孤客今長夜
黑衣新白頭屢空疑地肺殘帙碎天球茆屋牽蘿補銀

缸借月浮清羸本多疾遲暮況逢秋畏壘行猶苦風波
靜可休請量東溟水較比淺深愁

秋夜不寐念嗣宗

數畝方塘凭碧綾溯洄宛在欲憑陵芙蓉葉上應聽露
蟋蟀聲中忍對燈百歲希逢傾蓋客廿年仍隔白頭僧
那知秋氣偏能早得見新來雁字曾

摘文山句得咄咄雁書空

也道如虹氣未除南音仍候北天餘豈知禿節旄頭老
此後無從看帛書

同岑初集卷一

同岑初集卷二

菰城李令哲端木輯

餘不沈應旦方平參

陳謙 位存

張僧持見訪答贈

栖山近十載野性成丘壑但見山中人太古心未琢經
濟在農圃名根久脫落君來款柴門驚喜到猿鶴花陰
入座閒橫襟各有託不媿夙昔聞吟餘抱真樂風雅性
情事于茲可商度徵及我同岑屈指標大略惟伊二三
子晨夕許共索亡友曰丁韓 指生白 素心照冥漠所幸
詩尙存猶堪剖其璞相期寄知音芳蘭共斟酌知音冰

雪懷泠泠吐淵嶽出雲千里餘去天仍一握因知吾道
寬玄黃靡所著云何瑣瑣輩漫自布謠詠展卷挾清風
濫竽都埽卻

譚服膺使君以半月泉詩見示隨答兼寄令兄友

夏

胸不具丘壑難以入山水往往當境失縱逝若雲駛是
惟見道人心清得孤恃舍輿穿筠檜探泉悟泉始光開
納羣象疏澹寫形似物理恆忌全居半良有以疇其領
斯要曰君與伯子君來令餘不採勝猶閱士伯仍在瀟
湘寄尋應及此耳目所履歷寧復分遐邇忽思二漾閒
吾湖夾山草宕二
漾友夏曾賞之 蒼茫混起止肆泛情乃移譜情非藉

指馳語問寒河夢落河聲裏

寄潘天行

殘凍結春寒東風豁新霽良友揖河湄驚顧疑隔世一
笑拂蒼髯高譚入真契我鏡閱人煙動靜有分際守拙
匪學夷求工匪學惠養氣十餘年內視忘根蒂桃花發
空山相期事修禊

友人見訪同過袁莊喜遇孫鍊師

初隱必依山住久忘山好荒徑絕逢迎客到驚嘯鳥柴
門仍自扃散步池上草相攜度西岡塙影來松表密竹
覆幽居石壁雲根窅溝隨路迴轉漸入思蓬島況有長
髯翁云向此投老淵心藏樸訥內景殊浩浩笑余聰慧

浮菟玄何不蚤務春鬪菁華豈若秋畦稻瞿然悔昨非
鐘聲動縹緲

方屏山懷古

山爲蘇學士舊游地一名學士山余別業在其
下

枕湖列層岑蔥鬱聚雲族出郭纔三里方舟漸通麓曾
邀昔賢賞名勝皆可錄雙峰夾亭榭崇阜富杉竹日月
盪其旁歲久空殘築我家世結鄰數椽依古木懷欽索
遺址半與松根伏碑缺篆無存揣文須穆卜坡仙豈遂
往或寓幽人屋據梧緬高風秋陰吹肅肅

月下聽友人彈梅花操

月中萬象涵空深，月下忽作淒清音。
音隨颿引交寒卉，吹入羅浮何處尋。
一片孤雲覆茆屋，忽墮聲邊陰肅肅。
山高溪邃響不歸，遙隨月影畱虛谷。
春園三月梅無花，聊借絲桐發素葩。
開落疑在須臾閒，絃上指下如紛拏。
有時松濤竹浪互相起，與我徘徊暗香疏影裏。

曉聞鄰翁撲稻

薄收無可補老力，用辛勤穀散防鼯鼠。
場寬護野雲稻，牀聲斷續茆屋語。
紛紜嬾客猶高臥，呼兒問酒勛。

同施玄曠翁西帆集雨花禪室兼晨賦得貧中會

聚難

飄零隨所歷，良友各天涯。
晨夕偶然共，溪山到處佳。
看

雲浮素氣得月澹名花雅集應珍重歸心聊自賒

邀僧持過集話別

春歸萬樹綠雅集愛幽清山水相關處登臨不負名驪
歌當夜月客思滿江城此際應難別因知別後情

寄懷唐于野讀書棲霞寺

自君舟發後無夢不棲霞山遠青何極江空白一涯著
書閒入道得句靜看花此樂堪持贈隨雲寄到家

雁歸聲

秋空盪雲海肅羽掠孤村庭際一聲落天涯何處存淩
風頻繼響穿月不留痕曾念長征戍歸途隔雁門

過南郭舊址追感

今古忽殊局滄桑純用天草垂蛛網厚石覆鹿場偏青
火頽垣下黃雲荒渚邊偶來一放步行邁共誰憐

下菰城懷古

春申舊壘下菰城霸業煙銷感慨生木落無邊迷古道
笳吹何處動秋聲傷心戰伐三吳地浪語英雄六國兵
踞石傾樽忘歲晚醉看月色滿柴荆

懷淨土詩

大漠荒荒畏蚤寒沙塵易上黑貂冠行隨鞠草尋周道
倦倚淒風訊楚蘭潔淨江山愁裏憶蕭閒天地夢中看
西方彼美今何在幾度焚香入夜殘

古藤橋

石橋隱蒼藤倒影搖江滸問藤何年生白雲曾記取

別友

月出潮生江倒流別離無奈又逢秋吳江楓葉紅千樹
一夜隨風滿客舟

南湖口號

烏衣公子效時粧躍馬爭驅十錦塘錯認健兒傳出獵
道途驚詫避倉皇

城裏牛羊蚤出郊桑麻不幸近蓬茆牧人也仗將軍勢
那許吳儂土語嘲

吳景凱

舜俞

子夜歌

念子情的的視歡轉落落積雪語融冰我厚汝何薄

懊儂歌

願作烏臼鳥視郎他宿時嗁令夜頓曉
黃蘗染三葛慊慊顏色苦只爲汝疏闊

荳架

種荳臨窗北青青日已滋折蘆平作格引蔓曲成絲寂
寞親農圃艱難感歲時盤飧終賴是蟲雀莫栖遲

胡麒生

雪田

踏青鞵

館娃響屐雙凌波蟬鬢雲髻青
峩峩長楊春堤垂野竹
行行湘江拖六幅綵鷁大酺恩百斛樓高花萼香浮綠

水調歌翻西幸曲雀頭夢斷楊家玉

海上黃

海上黃勝河魴鱗甲耀日生精光珠文玉版人呼王南
風吹潮開牙檣榜人擊汰網罟張三月龍門道路長跳
波歎雪不可當江關各一方海道絕梯航掀髻燒尾圖
飛揚武昌建業悲滄桑昆明釣已去北溟遙相望淵中
多不祥江湖日以忘

垂釣翁

把舟垂釣者已是白頭時釣竿執著不停手手未得魚
何栖遲溪山漠漠蘆花白酒在前村天欲雪何如擲卻
釣竿歸一卷一舒自消息

郊外

穀雨春前後郊墟物候晴多年聞度馬此日尙懸旌太
古還桑梓中原淨甲兵但尋陶令宅同住亦同行

戊寅冬盡

輪臺詔下賜生還築得茆堂不幾閒萬卷擁來愁雪鬢
三杯落後忽朱顏春晴只覺溪山好喜事頻催歲月閒
老我白頭都不恨梅花日日放西灣

閨情

整罷小雙鬟掬水嬾無力念言生不辰焚香禮摩勒

感舊

故宮煙雨亂雲流柳色青青紫陌頭鷓鴣不知人恨事

夜深唳出望江樓

乙丑八月廿八日決熊督師廷弼爲敘始末

詔獄

雁門旗擁漢驃姚出塞三年更入朝
臉上胡沙猶未淨
西風吹作怨雲飄

讞獄

都門回首憶東遼
數載籌邊恨未消
博得清風刀下冷
至今頭上鬢蕭蕭

臨刑

秋風閃爍雁翎刀
斬孛囚旗領上搖
假若英雄都畏死
雲陽空設落魂橋

傳首九邊

麟麟鐵騎響鳴鑣挂印長征一薊遼死後偏能蒙上賞
巖關處處有名標

回京仍發山海號令

飲馬亭前嘶更驕轅門誰挂舊時刀但畱八面威常在
不用征人夜擊鑣

浴虎泉

何年浴虎向山蹊影落寒潭去路迷可識中堂古佛在
長松高出寺門西

陳元堡

玉仍

讀曲歌

儂有情歡無術目已成口不答

抱膝臥帳內人言不見儂儂思不見汝

聞歡三喚儂力怯不能應秋蛩聒耳鳴儂羞與儂爭

唐 達

灝儒

沈山漁祖母潘孺人九十

縣縣世變中執德難其恆三年一小降百歲如梯層每
疑社事譁兵甲固有徵母生隆萬前此風當未興細推
土行壤多本女教凌母潔以躬率母修與齒升天道雖
莫測碩果畱堅冰追惟半九十前後分淄澠家辛國亦
苦老眼經天崩微聞八股手裂國如裂繒末競乃彌熾
虛車將誰懲有孫慕皇古抱質殊淵澄非敢怒曹好齊

騁力不能倚母爲君父愛日歡繩繩儉德服以世其猶
見高曾

晚眺

落日望孤峰僧歸數里松村煙喧鳥雀潭影凍魚龍太
古人聲澹終南逸思濃逢迎謝城市行臥每從容

村齋受劫二三子久歸以詩召之

山河同寄旅侘僚獨奚爲盜後居無友童歸爨有兒秋
冬文氣暮南北戰聲遲所望多迂闊悠悠性自持

曹子顧寄感舊索和次韻奉復

羔雉登壇已蠹殘狂流日激不知闌慚從刻棘多時刺
悔學鏤冰得命寒喪亂百愁疑隔世文章獨喜脫迷欄

丹書綠字無人禁藜燼高檠乙夜彈

次韻答語水吳二公

名流多愧北山文南郭先生獨邁羣愛菊胸懷如有悟
負苓姓氏欲無聞奇才不偶今時福澹友相須別後殷
花約茗期聊未諾停橈興至或尋君

雜感

朝野情面窟少弔而多賀寧令載胥亡套例不可破
貧味狎乃辨爲之立短長菽亦飽于水糟亦美于糠

陳延厚

大惟

乙未元旦

愁心還傍曉雲生十載栖遲負此情自取椒花酬令節

不將梅蕊鬪春鶯
杜門已覺無常事
撫劍應知有歎聲
言念孝陵弓鼎地
令人空復憶收京

沈陶繩開

雨望

山川終古色
納略眾容吐
午雨花上過
出沒漲煙莽
雞聲落空沙
谿靜鳴寒艣
隔岸幾人家
垂楊妒眉嫵

遣興

細觀物理靜
逃稽時變荒
飢寒起糞土
垂老慕耕桑
歲單繭事登
午中仍插秧
生成柄一氣
勤動職所當
粗知辨麥菽
稍能候雨暘
乃於耨鋤暇
驅奴除鹿場
瓜豈蔓牆屋
百菜紛籬旁
薤白大如拇
剪韭三寸強
遲我故人

來雞黍分得將簷樹澹晨煙庭花媚夕陽青青泱明草
亦使列眾芳忝予檇散質戎馬久披猖幸免荷戈苦寧
辭把耒忙事業農兼圃勞生暫徜徉奈何衰疾纏無錢
料藥方羈栖重回首天人兩茫茫

秋分日於溪西穫早稻因看晚山

平明奴子腰鎌走秋半杭翻刈東畝美利流觀造化心
天人相與成功有老夫卽事啟柴門曳腳長吟百慨存
兒女哺含嬉一飽此身後死念君恩人風物序懷陳跡
大觜羣鳥飛向夕哀樂紛然掩此山簷楹月出爭農隙

贈允執

屋上山迴合雲迷仄徑穿無人花自雨有客竹方煙梵

響朝龕動禪鐙夜壑懸槿籬開曲折帶月漱紅泉

憶臯亭

臥病逢寒食春衣似欲輕草扶雙屐滑花覆一觴清仄
徑迴風細空潭受月明野桃無數發溪女倚新聲

寄懷子禧姪

三家村裏五家鄰公子遲歸不當春芳草依依通馬語
落花忽忽悟蛩身何人也索長安米有客如遺千里蓐
收拾相思報同學一庭幽默坐庚申

雪窗

家住谿西雪滿灣脣枯舌敝蠹魚慳微飄萬瓦參差外
小壓孤舟出沒閒不分浮雲遮漢闕似憐明月照秦關

極知李愬功名薄好奪焉支一片山

蠶箔飢

暖風拂拂弄柔柔溪上晴鳩接雨鳩忙喚小姑分箔飼
欠伸猶自倚牀頭

秋千仕女圖

綠楊影動繡旗懸響簇金鈴綵索牽記得去年寒食晚
軟風吹落一花鈿

吳景旭

旦生

客雒州除夕作

客心壯難任日月忽向除嚴霜漫浩浩層冰結路隅超
遙一失所萬感盈步趨經年作詞賦何用擬相如眷懷

哀所積筐篋有尺書雖無金石聲聊用託賤軀
五都游俠場三島仙靈宅伊余鬱無已興言在分索豫
往絕歡端悲來入窮節賤子秉微尚寂滅慰營魄躡履
遠囂塵炯介義唐跡寒郊時一望荒樹如薺列云何晦
明閒轉盼成歲隔通晨猶未央難以終遙夕

韋全社

眞長

山岑讀杜詩有感遂至湖濱臨風悲歌曰異哉爲
今日詠也同賦十章

福佑去帝側卒卒與禍會亂離未云劇旣裘倏尊大豈
不眾人歷吾汝獨長嘅賢聖亦何爲凌兢區內外
人心載天澤謨訓爰始生奚必表正烈顧慕乃至情瀏

觀前代末長者庶善成嗟哉不古處余懷靡所嬰被服
與飲食漫汗驚波萍得車惟恐後申以百歲盟回頭語
鵝鵝汝曹終眼明

貧窮不易邁儒者敢言勞所貴識命分安可辭名高戶
牖對妻子頃復徹雉膏驟逢故交游無面以自韜失志
有如此得亦同蟻螯聞諸負薪人道理析秋毫鄒先欺
我哉惟士爲特操

裹足去城闔蒼涼畏瘦日苗穗易耳目大夫閔如一客
從西南來近事不勝述祠宇題識新宮牆風雨疾蹉跌
路上兒前騶氣驕溢仰聞驢馬鳴俯聽將軍叱將軍尙
免叱金錢入其室歡若弟與昆誼等膠投漆茲者歲甫

登名田差甲乙遁逃寘流傭宦學饗元吉匪敢必有功
竊此擇勞佚亦復何須食無多客送詰

有德寶金城猘猢尙猶越矧擁亂世財坐汝保生卒翩
翻賈豎心覆以鹵爲窟賈豎何足喟大雅洎黃髮南村
言利徒食人盡皮骨義旅剽無餘交關未嘗歇豈悟負
而趨陽文重唐突智力竟如何江鳴空朗月

孤桐摧細薪濁河飛巨浪水竄鳳鳥栖分與蛟龍葬奇
懷最難持潔貞已可諒世事嘗徑庭丘山積臯狀抱節
謂之愚或語動成謗大辱貽高曾側身眾流上悲歎援
在茲斯人何得喪爲虐而助天亦未具昭曠

臆審九州心誰則甘在野塊土障奔瀾一木扶傾廈約

同二一
敕待漢官東南不汝假世詎無之人願學材二雅年少
希見聞徒死風塵下

語君君不了灑涕霑霜毛命我二三侶深耕去東臯聊
耕無厚穫賦分安所逃歲晏仍天寒短褐聲飗飗誰能
爲風欺中夜起長號

夢短不忘曙愁長匪自今上下餘千祀昭昭有此心追
亡旣靡樂與汨難久任依約申徒子魂魄爲盍簪嬾復
人間世婉婉伴行吟

杜陵老布衣飢寒訊誰救容瘁小兒前心悲戎馬後胡
爲須溪生褰衣顧思就其遇又可知將非隘宇宙哀矣
迄吾儔運命相奔走三累溯謳吟蔚若文史囿欲擬賦

一篇弱羽格猛獸展卷出胸臆鎗鎗金石奏所以古韻
人神靈比爻繇微名亦不免束脩尙用懋

陶

鑄子固

喜秣田初熟

歲易緣南畝時艱賀醉人力耕誠有益抱甕亦全真粳
稻東吳盛葡萄北苑新三升戀待詔五斗負頭巾何似
西疇好與然我黍陳方苞迎湛露菡萏足精神坼甲欣
脂膩低頭類飲醇椒馨壽胡考鮮腆續先民百禮從茲
洽千春慶此辰歸與偕所願憂醒不憂貧

趙胥顯

古心

出都感懷

由來野性戀煙蘿
彈鋏無庸作嘯歌
秋老彤雲橫古塞
天空清露滴寒波
夢迴南國沈魚杳
怨入西風落雁多
顛顛自堪評醉醒
宵征今去果如何

姚軒之

霞舉

詠懷

不亂童穉心不療
煙霞癖影借水爲家
身依石作壁武陵
漁可尋襄陽拜可
屈散魄高深閒相
呼出天域

秋思

風來何意擾池塘
翻亂輕荷葉葉狂
偏是隔林閒步客
頻吹襟袖遠聞香

遠水蒼茫岸柳枯
寥寥阡陌有人呼
雲低幾處炊煙接

古寺荒涼茆舍孤

歸鳥孤雲一曠觀
晴空輕越萬重山
獨憐天末分陰處
幾箇峰頭冷對看

同人夕泛抵含清閣而返

昔時離別在溪頭
別後溪山日帶秋
回首樓臺隱深樹
煙波漠漠對君愁

巖有穀

旣方

憶昨

憶昨垂衣霄漢閒
青絲白馬未窺關
黃門晝漏稀封事
侍女仙桃醉聖顏
遲日暖開春殿麗
絳雲低繞玉繩殷
鼎湖腸斷龍髯遠
方丈員丘去不還

蔣麟徵

西宿

春霽

華院悶清晝閒庭裊孤香翻經味玄偈嗒然情已忘疏
林帶餘靄輕露浥花光孤抱一以抒況復朋會良琴樽
自幽適談詠得微茫何以續前游一詠復一觴前溪漾
深碧紅雨撲人裳遙睇村雲卷晴波曳綠楊

張夢鼎

禹金

子山雜咏

女牆高插映浮圖隔岸煙蘿疊翠鋪夜半月橫花影亂
柝聲停處叫提壺

周鳳儀

子韶

行路難

余自乙未秋出紫塞登恆山復從雁門游平陽
涉太行過伊洛經維揚俱徒步而歸所知問何
爲作阮途之窮歌以答之

行路難出長安秋笳吹月關山寒兩袖霜華頻拂面孤
身倚杖穿雲端萬峰嵯峨凌碧漢遙望層嶺如波瀾百
折千盤不得上車摧馬逸空凋鞍顛崖斷壁股戰慄征
夫那許回頭看行路難足盤跚風搖木落葉聲乾凍雨
飛來暗絕壑陰晴忽變失重巒厲衣涉水蹈激石眼前
耳畔驚鳴湍百里從行半九十煙迷茆屋何時餐行路
難共悲歎崎嶇越厯辭岡坂河流莽蕩沙漫漫草根兔

起狼追犬城郭塵埋沒社壇荒碑臥道斜陽澹問古傍
徨心獨酸車輪錯繡塗泥野星照離離人影單行路難
強爲歡長城已墮紫塞關滹沱無波碣石殘禹疏秦築
一時爾天豈私我作高山萬里周流入駿弱人生倏如
遠行客但得人心匪狙獍爲君翻歌行路樂

行路樂心寂寞乘空御氣騰草屨晨光浴日吐朝霞五
色燦爛山頭萼松風蕭瑟神靈語石上奇花紛綽約陰
洞龍吟咽瀑泉白雲靄靄生虛閣鐘鳴夜半誦琅函黃
琬珠斗中天落行路樂任止作野田有烏林有鵲烏唬
鵲喜趁行旌當壚少女晚畱酌旅朋乍遇醪金錢太息
異鄉風景薄彈箏擊筑暫爲客山閒月白催行爵行路

樂資考索山川崎麗列篆書古教森嚴如典冊蕤蕤之
稷垂甫田冰雪神人藐姑射欽哉有響出唐祠螽斯振
振宜周宅猗蘭不及和卿雲趙民盼絕迴車驛行路樂
堪寄託前人遺事今人思今人尋攬前人跡長途且謠
知何求江水猶疑易水流吳謳一夕征帆返塞北風霜
載滿舟朱梅著樹仍綺顏又見弱柳可依攀如何對此
情不寬長安羽檄速星倌明發誰歌行路難

歲暮行

我生逢太和三母共提將自都桃李春寧經松柏霜蚩
蚩迷故訓大陸變滄桑哲人旣已謝保誨失嚴方孤征
飄塞外渺末陟遐荒朝看明月落暮追飛鳥翔煙霞滿

襟帶冰霰雜餽糗奇險厭躋攀莽曠轉淒涼所感異地
苦踉蹌趨家鄉登堂病妻在伯姊早淪亡問言及妯娌
靈衣散陰房癸女并哀兒慘惻聞我旁征夫心作惡屏
跡臥東牆勤恭憐幼姪置酒爲我嘗歲晏速諸父雞斝
行數觴酣言歎先德後稷近披猖賤子驚喪七請道古
行藏放勳有舊都其民樸而良后稷遺嘉種椒飴垂餘
香東魯孔聖宅禮法冠百王燕城易水上義士聲煌煌
武湯儼祇敬姜源流且長我昔讀書詩夢寐親文光今
獲拜芳躅肅然增型坊諸兄逮叔季鑒我言匪狂跋涉
九千里所見惟大綱今夕歡宴會數載不能常夜寤競
夙興百忍生禎祥高山來鳴鳥世嗣其爾昌

錢元龍 雲卿

長歌行

仙人何熒熒碧眼雙方瞳
五花雲滿身矯駕驂飛龍
遺我千年苓服食精神充
遨翔上京國長揖洪崖公
歸來得不死散髮游無窮

落落窮巷士

亂竹叢無路嗁鴉棲有林
野昏村火隔晨炊曉雲深
經歲斷車馬寒宵怯枕衾
閉門草長尺松子落庭陰

明妃

妃子從戎赴朔方
六宮眉黛失妍妝
可憐千古無窮恨
傳得琵琶三兩行

姚延著

榕似

同謝路然陳公朗兩方伯胡德暉臬憲畢四世少
參戴岵陟文宗陸石齋僉憲登華不注山

獨立孤峰秀登臨接落暉喬松參黛出怪石突煙圍潔
受風霜力高收山海威昔賢矜報復戰磧尙依稀

菊月壽蕭都閩

幕府開東海鄰光得共依壯猷傳馬檄舊學擅烏衣白
羽秋增肅黃星夜有輝介眉欣此日籬菊正芳菲

登岱

此游奇絕此生無皇項高居萬壑趨徑絕接天濛海氣
煙橫點黛小輿圖漢書誰繼雙司馬秦樹猶看五大夫

遙望吳閶垂練處道心堪拓未全疏

潘中臨

子咸

涉園課茗

及此三春日言擷瘦茗芽終朝不盈把摩挲香有加晨
起汲仙泉幽韻生齒牙茶水相與永實理靜無涯深淺
隨所會茫茫空自嗟

喜栖公淮北還報恩

想見經行處嚴霜透履痕風高搖柳岸月靜湧雲門密
行人誰識卑棲道自尊胡然懷舊侶飛錫過巨樊

懷水平禪師

是凡是聖大家猜時喜時嗔率意來一等勘人繩墨外

柴扉草掩不輕開

張嘉雪對

京口漫興

春水媚行楫遠分山與回迤迤檣際雲鬱鬱城端開日
麗芳草茂鳥雀喧社臺東南吳楚雄感慨何悠哉豈曰
邁方舟俯仰如何懷

信州

振衣靈山陽羣動悉凝睇屐虛萬壑流峰迴七十二人
煙浮薜蘿鬚眉挹空翠俯矚睥睨城戢形類槐蟻感慨
何能忘鬱思託遐寄

廬陵

章貢合灘流朝霞爛晴閣孤鶩不成行冉冉沈荒落
翩緩帶人方舟曠游泊展轉不自持胸中印丘壑

筠州

亂山環若孟清流細如帶坐嘯碧落峰神情頗疏快
幽禽索和歌野花簇飛蓋霽雪融燒痕茶叢雜春菜
離懷鬱望中詩情落雲外

長干曲

長干橋下長千里游冶紛紛鬪羅綺桃葉渡頭歌吹飛
秦淮樓閣縱橫起江總門前花正開謝安宅裏燕飛來
曾邀桓笛歌三弄漫蹴金蓮舞幾迴孫楚樓頭誰中酒
只今惟有垂楊柳六朝風雨大江連繁華又屬無何有

羅綺蛾眉故復新。玉樓金瓦已成塵。含章不見梅花額。
芳樂安歸買販人。我翻一闕長干曲。吹出當年舊風俗。
江水東流不復西。芳草年年滿階綠。

山家

窮陰千嶂暮。積素滿招提。戶外雲深合。窗前竹漸低。野
橋虛客渡。古木亂鴉棲。何處舒長嘯。柴門獨杖藜。

送南紀弟南還

日落燕山起夕煙。離懷惆悵各潛然。青楓白鷺依秋岸。
遠水孤帆入暮天。夢到鄉關情獨苦。望窮江漢淚雙懸。
茗溪花月應如舊。恨不相依共放船。

落花

獨上層樓一望賒蕭蕭故壘日初斜空梁泥落歸新燕
古堞雲深噪晚鴉鄴下風流非舊主西園名勝屬誰家
擎杯忽憶天南北幾度歡娛幾度嗟

謝朓登臨且漫論年年別緒繫王孫銅臺誰解生前恨
望帝難招去後魂小苑繁紅飛白晝孤村涼雨泣黃昏
無端索醉壚頭酒閒拾游絲拭淚痕

三生贏得兩眉攢樂府歌傳來日難枉殺流螢依腐草
生憎蛺蝶傍雕欄樓頭少婦銀箏咽塞外將軍玉笛寒
滿目興衰今古事不堪重過武陵灘

柳鞦鶯嬌恣意招只今空負好良宵煙生暗閣鸞沈鏡
香燼寒爐鳳罷簫潘岳情深頭似雪馬卿病起夢全銷

獨憐年少垂鞭裏踏盡西湖第六橋

送潘子見南歸

征鴻肅肅北風吹
鍛羽飄零獨去遲
霜夜曉鐘千里夢
夕陽衰草四愁詩
那堪阮籍窮途日
又值潘郎顛顛時
棋局酒杯收拾盡
從今何事不相思

無題

八音

金谷佳人欲墮樓
石城女子正多愁
絲蘿未託春先去
竹淚成斑怨不休
匏葉摛詞申妾苦
土花濺碧爲誰秋
革囊收取閒鞦韆
木筆終難結並頭

子夜歌

歡從月下來
抱妾花閒飲
兩意正綢繆
回頭驚妾影

鍾人鏡 止若

引見諸臣同宿銓部待漏不寐

銓衡署裏集羣僚咫尺天門禁籞遙
雨後鼓鐘猶隱隱院深松柏轉蕭蕭
吹堦競有同人和聯佩殊慚知己招
獨喜螭頭雲日近竚看明月傍青霄

俞 潢 天來

鄉土謠

棟花飄野繭白吳綾他日盈刀尺

南林初集

宿雨侵晨後寒深野寺中近郊雲氣密
隔水磬音通放浪歸吾黨衰瀉任世風
縱橫施劒技刻畫訴文窮蘊負

將無異幽尋聊與同情隨黃菊遠語到碧天空蔬筍填
飢眼清醅汰憤衷夜催庭向暝林老葉辭楓堤畔蕭蕭
色遙看月正東

沈宗圻

雲石

寒食同李惟肖游大小石灣

江潮懷古岸奇石當空浮雙峰峻且曠登茲寧復憂千
帆恃風力瞬息莫可求下望東郭門纍纍多荒丘松聲
接千里盤徑憑遐搜振衣獨長嘯白雲飛正悠

季春惠泉獨坐

靈根天外交松頂聲長流微風動幽香花氣明高樓坐
久不知倦月白山欲浮

有感而作

世事非曩時慮禍應緘口何以得保持息機如木偶禮
義聽敲危東家任妍醜悲憤慎弗吟相識慎弗友晤對
契深心不平能不剖一言隙可乘機發已在肘僵臥袁
安廬委身且藏垢落落散疏襟天地自無咎

飲酒

終歲困窮乏朝來飢復寒菽麥非異味稼穡何其艱傾
身營飽暖欲告苦無端故老畱余飲持觴追舊歡迂談
驚四座痛哭惜春殘人情殊叵測反覆似波瀾躬耕當
努力感觸增淒酸何如卽所欣且以致自安高懷與之
俱邈然天地寬

古人戒近暴近暴禍相侵今人戒游嬉游嬉招驕淫託
身貴獨立閉門恐不深好風吹我廬蘭芬沁我心引領
望東郊寥廓寄高吟但願長如此聊以豁煩襟

田蠶歌

神來降祥不降殃貪墨者黜陞循良春風影裏桑麻長
男兒腰鎌割秋黃池中白魚二尺強持魚換酒各盡觴
老幼雜坐仍無妨長歌短吹樂未央

村居

此地堪深隱而無禮法煩鵲爭松子墮魚躍荇花翻晝
靜天難老庭空雲白鷺可能看不厭待月到前軒
貧來能幾醉閉戶讀農書親戚誰爲問友朋幸不疏感

時空浩歎懷古獨躊躕薤草還驚蕙眷言莫亂鉏

葉聖野夜坐

十年高興盡此夕擁輕寒互答惟秦曲相看但鷓冠暮
雲歸正遠落月照將殘寂寞山城裏淒淒畫角難

幽興

小築堪容膝清風長薜蘿池平曙色滿石亂野雲多新
綠圍虛館殘花逐逝波歸鴉相向立冷落白山阿

晨鐘

枕上愁多夢依稀記未分孤光星欲落清響意何殷寺
寄千山外聲傳幾處聞遙知天際半應有不歸雲

早起

悠哉人事遠睡足立中庭曉色天邊月晨光屋角星養
生通蝶夢失意悟鴻冥只此多閒趣荃蘭雜佩馨

修葺數椽顏曰通隱

幽人昔所慕于此絕逢迎選地偏卑狹移家半市城巷
深難結駟林靜媿簪纓漫自稱通隱猶懷風浪驚

九日登峴山

秋山木未脫疏樹見人家日落浮空際煙開望有涯孤
村流水外荒寺夕陽斜感慨臨風處幽懷起暮笳

草堂夜坐

風塵何日靜避世更誰羣樹影懸秋月庭臯宿暮雲情
深知已在夢斷故園分一曲鄰歌罷疏鐘到處聞

和陳皇士懷友原韻

開樽重憶鑑湖游此際懷人已暮秋誰謂報投仍故事
獨將篇什付離愁千灣碧水遞來雁幾度微風帶遠舟
西塞且垂今日釣權謳漁笛自相酬
已知無地足歡娛忍使音徽處處孤問世幾人終草莽
悲時吾黨半菰蘆生憎滅刺稱高士枉殺狂歌號酒徒
他日班荆論往事唾壺缺盡老雄圖

漫興

丘壑多情到眼青閒來偶學注茶經一竿釣破煙溪雨
半局敲殘野鶴汀身似冥鴻防被弋事同逆浪歎浮萍
不妨善病隨時老枕簟悠然戶半扃

和李霜回同費皜庵李不器李惟肖夏日泊舟峴
首納涼逸老堂原韻

石友相遲泛小舫一帆風正爲山停登臨且喜人皆健
禊飲能禁我獨醒樹杪坐看征騎沒夕陽遙望遠峰青
巖城薄暮猶寬禁尙許閒憑水上亭

賦得滿城風雨近重陽

滿城風雨近重陽籬畔黃花次第芳海內弟兄非一姓
天涯賓客幾同鄉題詩不減登臺興問世誰傳落帽狂
今日草堂相對處孤懷愁絕更淒涼

鬪草

郎與相思子時時佩帶閒相持無可勝含笑傲叢菅

石橋尋已徧，覓得有情花。姊妹不相識，爭看髻影斜。
客中買侍兒，相依匝月攜。歸似拂其意，賦此解嘲。
背飛還向宿，雙燕豈無情。看卽辭秋社，殷勤話五更。

梳頭曲

有序

綢直空憶彼，都曲局徒愁。采綠夢迴，綃帳青絲
一編冷透。玉釵巫雲三尺，不覺沈檀香送，何當
髮鬢光生。欲梳未梳，今日雖強，昨日將鏡照鏡。
後身穩稱前身，隨他千古妖妍，未許一朝零亂。
花磚日午，夢初醒，握未成盤，忽復停拋鏡。幾番還語鏡
問他，曾否影隨形。

日日臨妝不計功，氍毹梳得影玲瓏。雖然昨日青螺好

未許今朝昨日同
寶鏡斜飛背影翻
同心同影幾珊珊
莫言影似心難似
不起波瀾鏡裏看

晴郊

閒情曳杖出柴門
爲問春光幾處繁
浦口偶逢雲欲斷
看他飛去在何村

江行絕句

浪細風輕水織紋
小舟橫渡日方昕
雲封不見山高處
未識高山曾有雲

小窗數帖每爲燕泥點
汗因垂簾謝燕賦此

怪爾銜泥汗卻書
茆齋未許卜巢居
垂簾任自論交去

始信濃情不若疏

寒食作

春深是處綠成茵
此際堪悲老病身
極目荒郊新墓裏
去年多少拜墳人

同岑初集卷二

同岑初集卷三

桃城潘居貞天行輯

晟溪閔亥生未孩參

徐陵

弱陵

春日移家別諸鄰

東風吹草徧天涯樹裏嘯鷺送曉槎
烏柏葉紅方作客櫻桃花發又移家
罷傳雙履同尋藥獨荷春鋤去種瓜
回首月明村舍路一溪流水板橋斜

喜諸子看菊齋中

庭隔莓牆一丈深寒叢花發病還侵
窗櫺寂若牽雲臥屐齒蹙然冒雨尋
交淡如秋唯薦水人閒于菊共依林

話言正是堪終日顛顛無煩作楚吟

初冬

借得西清一丈寬
簷牙風急葉聲乾
但敦氣誼腸俱古
不覺飄零序又寒
幽興無妨聽蟹眼
矯情終笑買豬肝

時客趙木
生署中

城頭況有南山色
容我支頤盡日看

夜坐

山城月暗動初更
細理愁絲縱復橫
萬里弟兄風雨夢
千年骨肉死生情
髮同腐草春還長
名比金丹老未成
淒絕不堪重對影
小窗自起滅寒檠

巖

檠

無念

擬古

長江萬里流中有故鄉路寒風響百草夜夜零白露還
顧洞庭波木葉已非故何況有盡年曦暉迫遲暮茫茫
野煙飛盡是北邙墓誰爲不死人請君垂竹素

人壽能幾何迢迢俟河清今我不爲樂日月逝其征錦
衾抱獨旦夢想遺所親古來涕淚地春草不復青天寒
瓶水凍誰別淄與澠

迢迢別時路攬取城南秋沽酒贈行役買鞭絡馬頭灑
涕墮爲水一別寒衾裯十年無消息雨散不復收永夜
凋朱顏鉛華不可求當年娣姒輩歌舞侯家樓去時金
雀釵慙懃結綢繆今朝隴頭水各自東西流何當見君
子明月彈箜篌

問客何方來云自瀟湘汜歸程歷三月始得及門里蕭
蕭戎馬鳴日夕悲笳起豈不顧錢刀時時念妻子聞君
行路難淚落從此始

早秋

一雨生秋色晴雲立遠峰天高稀度鳥地僻愛鳴蛩薄
暮漁樵入清晨耒耜從殊聞有幽事香氣送芙蓉

庭草

芳草春堪愛貧家亦滿庭自因生氣得不改舊時馨燕
翦難分翠花飛轉覺青燒痕何處甚雨露總教醒

柳塘春水漫

一望綠煙盈遙憐夕照明倒涵千縷動低蘸一枝輕月

到影全碧春流天欲平迴風如落絮添作半溪萍

小雨

微雨蒼江暮催花溼不妨乍添三徑潤并作一林香把
釣歸來蚤征帆去路長絕憐蘭蕙好更與媚斜陽

庚午下第

共道隋珠價易酬誰知明月竟難投悲歌不覺飛鴻暝
烽火遙看牧馬秋雲外孤城橫海郡風前哀笛古梁州
無端吹動霜華曉一夜征人盡白頭

近塞征鴻九月飛斷腸秋色向南歸有時花酒沾羅袂
無歲天涯不布衣雲斂夕陽橫渡口夢隨明月到漁磯
不知燕市千金駿誰報西風苜蓿肥

秋柳

青葉蕭條黃葉枯西風颯殺白門烏鶯花已去成離恨
雨雪難教入畫圖路傍章臺霜氣老笛飛湘水月明孤
莫言攀折愁中盡曾向勞勞一望無

弔孫太白墓因題歸雲庵

百世猶聞蛻骨香阿誰重葺挂瓢堂何須死傍要離墓
自信生同太白狂耆舊有情悲鐵笛荆綦無路薦椒漿
臨風長嘯還三歎古木千山盡日蒼

九日舟中作

十載干戈日夜摧戰場籬菊幾回開茱萸不到柴門靜
木葉交飛霜氣回別浦移舟逢雁度秋砧何處擣衣哀

江天寂寞空搔首誰爲淵明餉酒來

止止齋菊集

萬壑風悲木葉涼獨畱籬菊殿秋光百年豈必重陽醉
三徑方知九月香湘楚騷傳餐落蕊義熙人老對寒妝
若非天醒繁華夢安得林閒破曉霜

秋盡

遠水斜陽一釣舟蕭蕭落木隱殘秋天邊獨鳥衝煙去
雲外孤峰入暝收晚對黃花甘共老寒無綠酒向誰謀
來朝正朔初冬候百歲難寬霜露愁

晝夢

三月已暮吹野香百花亂落春茫茫鶯聲嗁老綠陰靜

燕飛不來清晝長
人間無意問甲子
枕上但覺成羲皇
大鵬斥鷃各有適
逍遙一笑師蒙莊

郊西曉行追感亡友茂貽人穀

推篷剛起日初生
宿鷺翻飛迴自明
煙際漁舟蒼靄破
人行鳥道亂山輕
吹殘落葉空林影
過盡高天只雁聲
無限故交塵土夢
匣琴孤劒幾時鳴

有感

角弓珠勒紫騮騎
夾道旌旗飲餞遙
舞出天魔嬌隊隊
兵連蕃漢馬蕭蕭
已誇節制兼南紀
況復中書統百僚
借問元戎誰得似
姓名原是舊征遼

殘雪

漠漠同雲去不回
遠山微露數峰開
晴簾弄影時飄絮
玉樹花飛似落梅
灞岸欲攜孤騎往
江天偶見一漁來
最憐皎月虛相映
還待陽和拂曙催

訪費疇庵道峰山居

竹徑蘭坡小石梁
半簾松影晝偏長
魯連何必居滄海
杜老聊存舊草堂
山勢入空成兀傲
池光無雨亦蒼茫
悠然日暮方歸去
猶憶閒庭接妙香

雨後月

皎皎雲生歇雨殘
娟娟孤影月華寒
天開桂闕搖晴佩
地湧金波濯露盤
蕃馬夜嘶秋苜蓿
石鯨風動漢長安
霓裳一曲人間隔
望切冰輪萬國看

暮春酬天行

家貧無策買深山小隱惟參向上關欲采紫芝天地老
已看青鬢雪霜還春正獨抱遺經恨人日相思得句閒
爲問舊游鸞鶴侶夢回瓊樹幾同攀

徧處桃花春水香聞君蚤歲謁庚桑

君家喬梓曾遇異人

曾游天

上雲霞近一墮人間歲月長唐殿幾時頌綵勝商山且
爲頌靈光他年得酌仙瓢酒黃石無忘孺子良

出塞

黃塵黯黯覆臨洮壯士臨關拭寶刀一騎獨乘邊月出
左賢生縛陣雲高

大將朱旗映海霞親提萬騎列平沙朝來款塞輸名馬

盡遣龍媒入漢家

唐祈遠見示秋園雜咏以秋野報之

夕陽流水過溪橋有客長鑱戀藥苗
野老相逢不相識何須蹤跡混漁樵

茅元銘

鼎叔

詠竹夫人

不分承君體終慚說抱衾蒼涼君子質
遲暮美人心班扇捐同昔湘雲疑到今
歲寒曾昔誓敢怨白頭吟

姚延啟

敬輿

過祁大夫祠僅存一碣

歷選晉羣辟中葉啟令君六官盡民譽
三軍簡哲人策

同三
詢黃髮舊勳爛絳圖新老成乞骸骨內舉罔避親先公
後私怨殉主庸願身列卿有欒范專闢推智荀眾賢和
于朝濟濟古臣鄰如以水濟火寧畏楚與秦祁侯心秉
直爲國廣榘薪推轂皆緇好藉手答光宸左氏紀賢達
千載懷貞珉空留一片石古道委黃塵

闡中分韻得秋字呈同事諸君子

星分參野一輪秋太史占雲五色浮十二連城光照乘
三千多士氣搏牛碧桐肅肅懷金井玉露灑灑映綺樓
四座枚鄒能作賦品題蚤已動宸旒

靈石郭外觀葉元孺較射

晴原水落草芊芊命騎彎弧指拂弦得意射穿楊柳葉

翻身一躍紫駟煙健兒蹋足呼猿臂巷陌傾城看錦韉
歸去饒歌添勝槩青州從事湧如泉

趙省分較偶題

猶恨當時被別還青衫點點淚痕斑而今幸得窺全豹
管領春風次第閒

過韓侯嶺

淮陰城下一漁竿手把絲綸上漢壇寥寥楚國無知己
誰與王孫進一餐

靈石西行

渺渺煙村曲曲川層山層水幾層田吳儂錯認江南景
只少漁翁一箇船

吳法

匡度

秋夜王大野過話

秋雨不覺苦秋風嘗自閒
秋來舊時月黃昏忽叩關
乘風又乘雨幸不改襟顏

晚歸

江天渺何際無聊一雁飛
雲山兩不礙夜夜似僧歸

平山堂話別

倦鳥栖栖眷故林那能去
便忘花陰平山堂上清歌徹
我亦臨江酒共斟

陳

泐

奇生

登羅搖

日高嵐氣歸停雲如征蓋拄杖陟崇岡更覺天地大眾
山互百里奇峭此焉最恍疑靈貺通不媿風雨會石壁
苔蘚剝清芬來松檜澗喧林愈寂肅肅發天籟有芳誰
采掇芝蘭雜蕭艾猿嘯翠微中鳥落孤煙外長嘯立峰
巔蒼然生暮靄

東巔獨坐

日午游氛寂孤蟬在高樹飛泉灑林薄竹木涵秋露山
鳥聲千百羣鳴若有訴巖花各負奇設色不可數仙果
時自隕紅紫紛當路天空萬類靜幽響自相赴獨坐長
松下翻然增永慕北望渺茫茫中原在煙霧

山中長夏雜詩

欲暝山氣佳，輕風蕩林薄。飛鳥望故枝，夕嵐還夜壑。幽人時杖筇，煙深獨采藥。

坐久煙靄息，夜色足幽賞。竹露滴新涼，皓月漸東上。河漢聲西流，羣星益昭朗。如向冰壺行，陡覺樓臺敞。古殿閉殘鐙，白雲自來往。

夜雨

寂寂禪鐙淡，孤眠夢亦幽。空山一夜雨，頓使萬聲休。白石歌難旦，朱顏歎易流。寒蛩如有恨，達曙未能休。

春城

四海干戈白日徂，樵漁何處穩菰蘆。停杯欲話當年事，細雨微風聽鷓鴣。

周 斌 武伊

秋思

昨夜初聞雁飛影必雙卻從西北度悔殺倚南窗

閔

涪

培風

懷友白下

白月樓高梧流陰及階
屺拂石復聽花無事來坐此
忽憶昨歲時落花河之汜
細語到花暝高談問天咫
今君京華游煙月秦淮水

畦菜欲花

沃野竊厚倖繼花桃李時
桃李游治花不豔田閒兒
閭左富車馬但飾黃金馳
不知事耕插布地且不貲

倪雲林六君子圖

天地已閉山海枯明堂已圯梁棟無蘭摧玉折供樵蘇
崩川倒壑佳氣徂雲林先生迂不迂道無人物堪畫圖
忽然圖作六君子以木代人美稱呼試問君子何人乎
松柏樟枏及槐榆六樹行列在平地幹枝修挺兼扶疏
生有萬石磊落軀仆爲萬世柱石需挂向堂中竟山谷
蔥蔥鬱鬱天子都匠石見之空挪揄斧刀焉敢加鴻儒
君不見鄭家蘭趙家竹筆墨因之分寵辱元季更有荆
蠻民不屑畫人專畫木嗚呼人不如木木勝人從今著
眼看山林

采桑曲

東風吹綠到煙蘿桑柘黏陰晚較多布穀聲中行欲住
蠶飢日暮奈愁何縑車軋軋度煙霧縑作千絲成匹素
千絲萬絲霞練光會見織作雲錦裳千鍼萬鍼成黼黻
會見佩服朝明堂里胥到門催逋急機杼一空雙淚泣

桃花雨

芳堤綠色綠不已灼灼枝枝然欲起輕雲彌漫帶微霧
十里紅香濛煙雨游絲冉冉不絕吹山蜂海燕相追隨
深紅近裏淺紅遠春花瘦處春風肥憶昔溪樹流紅萼
漁人一去同飄泊兩岸桃花對寂寥一溪煙霧鎖巖壑
於今會許重尋謁醉臥春風與秋月

松林讀書圖

誰許青山怡我情，翠微深處一經橫。
千尋虬影循階綠，萬斛濤聲到枕清。
葉裏靜陰餘邃古，枝留明月伴殘更。
輸君歲值嚴寒日，蒼叟還來訂久盟。

陳

萃

聚正

山晚

薄暮長煙發，橫空度翠微。
嘯從巖際落，樵自水邊歸。
谷靜泉聲曲，月高花影肥。
香生蓮渚外，次第入羅幃。

山行

山光晚更好，策杖過山家。
徑曲通游屐，禽喧墮野花。
卷簾松影入，啟戶竹風斜。
農事方勤作，桔槔沿水涯。

贈孫又邠南還見訪

蘇門作客久秋盡始還家踏葉重尋我扶藜共看花山
煙隨徑折雁影逐風斜一榻縣相待長期過水涯

秋夜夢過翁西帆山齋

相期幾次過君廬此夕追尋入夢初錯認桃源迷道路
卻隨楓岸問樵漁窺鬪髯題新句開篋參差出異書
忽聽疏鐘來枕畔起看殘月照窗虛

早秋

一望香浮渚軒窗傍水開暑隨青嶂遠涼自白雲來泉
響心逾靜蟬鳴晚更哀扁舟已返櫂知爾采蓴回

婕妤怨

寂寂宮門掩時聞疏雨過遙思別院草何處得春多

宮怨

晚妝撩亂欲重勻
夢裏迎車不厭頻
猶勝明妃未出塞
此身還是漢宮人

嵇旋順先

晚涼

閒林送日晚餘涼
意到黃庭一兩行
編竹手黏青蔓色
捕魚頰贖白糜香
階頭淨埽鴉千點
牆角慵修水半塘
風起女貞花似雪
籜冠藤杖聽滄浪

施元禮索觀近詩許攜霜回先生東柯樵唱見贈
荒園竟日此柴扃
借竹留風作澗聽
繪出素心黃葉落
幻成玄想白雲停
無山買屋埋生骨
有客尋詩破草亭

細檢東柯三十韻爲余一一著前汀

茅

固

古心

九日社集

同人契遙集獨夜栖閒房翩翩振六翮擣藻競迴翔清
商奏音徽琢磨爛篇章亦復澹秋容芙蕖曳成行匪不
憶登覽悲風搖寒芳飛觥促無算絳蠟輝沈廂疏雨遲
深更天末思褰裳

柳色

廣陵空憶舊離宮搖漾春光今昔同落絮未飛寒院雪
當門款坐隔溪風鵝黃終染深秋黯螺黛初添向曉濃
一騎忽回紅叱撥鞭梢遙挂翠微中

搖蕩千行豔大堤錦帆飄泊任東西舞翻翠袖花間落
學畫蛾眉鏡裏低芳草陌頭添黯淡黃鸝枝底助淒迷
年年風雨辜寒食幾見游絲醉似泥
占斷韶華只九旬故將婀娜昵行人空條弄色江天曉
短笛迎風睨睨春葉暗棲鴉藏影慣花銜乳燕帶泥新
悲涼南國千秋恨不獨隋家淚染巾

梅花

玉鱗浮動縮朝暉小徑毵毵點客衣低亞女牆偏倚角
微蒙村墅未開扉波洄迢遞傾湘浪風急飄搖度隴飛
一自花奴催羯鼓不堪深院鎖江妃

陳

忱

遐心

春日田居

石田不力耕蒲稗供鳧雁陌上不植桑荆榛任延蔓豈
不念飢寒所得在閒散租吏急追呼我獨忘憂患悠悠
北窗眠山光變昏旦晴暉滿戶庭春風勸餐飯名業炳
身後千秋亦云暫殊覺天地寬復何發深歎仰彼百尺
松蒼然覆清澗

妾薄命

陽春豔豔東風急楊花燕子都無力賤妾門前橫大溪
湯湯日夜波聲立空閨日暮何所思君忘妾忘情兩知
蘭摧蕙泣山鳥悲機中錦字盤中詩玳瑁釵頭么鳳死
游絲猶繞煙花紫山上薜蘿空自長敢問新人顏色似

羅敷漫誇夫婿殊夫婿幾人能如初干回角枕代鳴怨
谷風習習行遲遲

秋冬之際感賦

偶然一事古人同兀兀經年廡下窮今世斷難容季布
當時原不重揚雄故宮禾黍嗟秋潦積晦山川想朔風
海內知交淪落盡蕭蕭此際與誰通

湖海元龍氣已陳猶餘擾擾歲寒身天陰屢日不成雪
世亂十年還有人古樹積風仍作雨寒山凍日竟如塵
窮冬何事差堪慰聞說周師會孟津

邊城曲

八月關河雨雪飄平沙一箭貫雙鷗閨中莫寄寒衣至

斬卻樓蘭賜錦貂

閔畢成

玄暉

雜曲

太守專城南邊廣
澗無波十年垂纓結
綬稱賢五馬車
服翩翩鳴鐘伐鼓曲
筵秦箏趙舞暮天織
羅霧縠娟娟
文帷瑤席翠鈿賓
從雜沓郵傳珠華耀
履三千樂往哀
來數年烽火甘泉歲
纏屋宅毀敗陌阡時
事已去可憐
老年獨聽春鶻

董

錫

來仙

憶友

說劔鳴琴憶昔年
東風吹斷暮春天
朱家郭解渾閒事

冷澹還思蘿月緣

唐

鏞九成

曉發湖趺漾

半月沈浩波輕風送弱浪清氣橫四出參差羣影放雲
色朗欲平餘星尙西向秋思落蒹葭帆帆爭先上

暮過前山漾

日暮輕帆急菰城望杳然漁分兩岸火雁破半山煙凍
勁開舟曲更深誤徑偏卻憂川晶晶無計可投鞭

初冬

紅葉清流納稼時鳥嘯煙處更移枝東山霽色方亭午
不減春風滿地吹

吳景先 來許

投謁不器社伯

仰止高山久青蓮一後身雲霄誠再造月旦握人倫吟

嘯垂初典冠裳振大紳十年懷刺在相對別生春 昔年被難

荷翁一言
得破塵網

書帙閒乾蝴蝶

春去猶翻舞翼雙何年隻影墮縹緗秦臺粉態空遺恨
漢殿金容可再揚開卷漫教隨蠹走映書能亦伴螢光
青陵未解傷心曲不向莊生夢裏忙

董漢策 帷孺

出塞曲

招搖建朱幢王命董六師號令出意表九天焉可知一
鼓萬幕合吹鏡八門移鱗列車與徒開合祕權奇斬刈
彼爪牙制虎如嬰兒神威據長算擒王欲奚爲

必勝非營壘高勳豈多獲英雄覽山川五嶽如咫尺秦
隴天下首楚豫當肩脊勢比常山蛇神機轉圓石六合
以爲陣指揮破梟逆咳唾帷幄閒狐羣已落魄

凱歌息餘怒班聲若殷雷白骨何纍纍彼驕亦堪哀捷
書報聖主獻俘丹殿開戰克荷皇靈任臣畢微才功成
樂高隱何事登雲臺

早發丹陽道中

志往誰能住馳車逐輕羽侵晨悅征驂曉色布清素肅

蕭殘月中人影淡霜樹青山慰所求
旭日照煙聚行役
廢迂闕童僕親我恕峻阪嘗先登
馬勞且徐步雲氣散
朝霏平林衍修渡流矚已忘疲
春花滿前路

秋日山行

不絕數百里秋氣連高峰
四望天欲盡下見龍蛇宮
野橋宿茗合長堤新蓼紅
前途杳無岸回屐時復通
杖策幽人宅迢迢迎清風
來往忘日月空山常自冬

夜讀

託跡秋山內寒雲貯空堂
幽人抱柔瑟玉樹垂星光
良夜一何美千花含清霜
半卷足歎息興衰互滄桑
短歌復長嘯激烈繞層梁
眾籟歸寂默嘯鴉自迴翔
照我閔

勞意皓月懸匡牀

春日過相溪訪潘天翁喜天翁病痊話次有感漫
賦

鑑湖受春風亂雲安足數泛影入空濛溪山互吞吐碧
水天光沈鶯花澹無主惟彼蘆中人抱道棲桃鳴一琴
留千春松聲意爲譜心兵旣已除病機脫如弩情眞兩
不厭世味皆塵土堪歎市道交聚蠅飛肉羽初歡難具
陳調如燕方乳曾杼未三投晉讒復二五疑陣幻奔濤
含怒傾河鼓爭似道人閒鶴夢恰當午雨重萬山深相
與話滄古

四香閣

碧虛無限意小閣貯清暉雨過溪山合雲流松竹肥飛
香投靜觀息鳥獨知幾慰我登臨興高深有翠微

送劉彥培北上

欲語黯忘言離情好夢存臨風怨帆影寄想聽江猿未
解琴書恨猶憐花鳥溫遙知憶君處蘿月正當軒

蒼弁清秋

蕭瑟山光澹不流碧巖深處亂雲秋澄湖落照遙天接
遠寺疏鐘虛谷留別有飛泉投客夢自無明月挂人愁
烏巾攜杖尋山去好共清風渡石樓

秋夜聽徐宿南鼓琴

萬籟已息明月還流泉歷亂五指閒曲裏光飛澗邊樹

調高響落湖中山主人得意但孤坐白雲無心方滿關
瑟瑟秋聲戰天地誰知此際絲桐閒

甲午遣歲

欲去不去歲云暮欲來未來春較遲長吟小宋南亭雪
快讀老杜夔州詩全身不匿青山影養晦但遣蒼松知
年華沈醉君休笑莘耕渭釣真吾師

癸未孟夏同畢單厚游崑山甚樂得詩

野客狎幽性山禽常在門坐看雲物墜日影欲浮村

蒼弁吟

花雨雲淙小洞天萬竿修竹泛寒煙石橋明月楓林下
坐臥其中可十年

金陵寄家

梅花爲紙錦爲纈寄報平安碧玉堂猶恐山川誤閨夢
爲言儂已到柴桑

吳景雯

雲文

予見以廷對偕南紀入都詩以送之

驅馬聯鑣出雙龍躍遠天壯游知浹歲良會計何年攜
手語難竟臨歧情重牽最憐今夜月偏傍別離船

施之圻

贊皇

草堂

結廬爲看山羣山當扉豁矢此勿諼心匿影去城郭荒
村八九家澆淳均可樂鉏庭護蔭任棘成籬落草蟲

惠好音溫風靜簾幕玄鳥各生翎待秋歸上壑吾笑戀
吾廬一朝失寥廓

所寄本無所杯瓢古人癡落落大地邊題此云我私我
私不足恤我心有餘悲出門倚高睇白雲相見怡白雲
何翹翹態與貧土宜南山飽肥蕨佐以北牖葵自然足
冬春息交而誦詩

歸德府

飢烏呼嗷嗷羣下市里啄商墟久無煙行旅粟自握官
府寄野寺里長徒敲扑長蒿長丈五其子不可剝兼程
望投止風雪如刀稍枵腹負凍涕吹火拾腐糗同行百
餘輩相對各皴皴古來河濟閒誰致是天斲

感遇

吾本率真人眾驅亦曲折礧錯傷天然人巧喜凹凸骨
肉憐吾愚朋友不授訣春風吹樽前予子不須鐵吾見
搖尾者山鬼失其拙近作無懷吟冷嚼巖頭雪朝煙流
柴門杯影夕陽別濯足嘉臨流游目與高絕眾棄吾獨
收教誨領不屑

梳頭香草歌

草是河邊草郎爲舶上郎河邊舶上偶相值何事聞香
卽斷腸黃頭把篙篙滑淥青苔藉香香已土飛香不到
金閨中翠冷紅銷香淚雨茫茫湖海少丈夫丈夫都向
香邊取

野草花

託質本微賤道旁分定之歲輸桃李賞日見牛羊歟天
不吝春雨地能出陰滋人生私歎息榮落固其時

菊放

報我辛勤渥前除已夜霜多神豈貌態卽色不偷香落
日臺邊淚西風馬背妝古來隱逸者半爲盛年傷

渡江

三折渡揚子江干不自禁乘風時事淚擊楫古騷心無
恙布帆在多慚傲帚侵十年如一日幾誦亂流吟

入山

花時輕著屐眾壑已鳴雷未綠半林草餘寒數里梅杖

忘晴鳥立衣溼野雲隕滿目尋常事故山今日來

移家趙灣相傳以文敏名

南溪清遠王孫草北郭丹青學士山蝸角不堪遺世上
瓜田想尙在民間鳥嘯十里蒼林幻人負浮生白日頑
屈指往因今復再休心何處聽潺湲

寒食避兵村中

孤村三兩不謀鄰日餉春風慰苦辛疏竹接籬深野望
小桃當渡獨撩人頻聞逐婦漂搖語數盡榆錢旅泊貧
憶得江頭酒債處相思猶欲漉綸巾

題畫

卒歲泉石閒去膚喜見骨歷歷與空空如得四更月

李夏器

不器

巫山高

巫山高髣髴太行嶮巖蒼梧岩堯巫山高入煙霄翠
葉驚颿玄猿挂條翔鷗騰鵠爭游遨雙爲侶兩爲曹天
空日落思忉忉有美一人度影浮沈出巫岫攬巫雲湘
水深不深洪濤迅復峭壁聳林夢想音徽相疑至今欲
往從之在田在淵在天西粵西楚西秦山胡高水胡深
日出月入開重陰萬里倏忽若比鄰可思未可見秋露
傷髮春風感心遠道之子屑淚悲吟

金山慨然

此山出江腹孤危絕聲援粥粥如不守其氣靜自存造

物好用奇安頓乃根源不然茲卷石能免魚蛟吞千僧
恃佛力兀坐無一言客到憑遐搜誰能敘寒溫禪房結
幽槩廟貌龍王尊金人昔匪茹五騎窺韓屯雖僅獲其
二而江南勿喧明時非乏才斂影以抱村使陛下赤子
交紛盜中原野燐接青光餘民慟朝昏大帥氣先盡士
卒奚足論矧茲貪酷吏殫力樹眾冤半餐苦未飽迫索
驅之奔舉頭語飛鳥如爾毋憂煩

觀元所造渾天儀

學失在四夷迨元尤信然用理確有見勿爲古所牽觀
彼渾天儀結構于象先出幽與物會寒精吐層煙日星
不敢越碧虛仍勾聯冥心索太極太極當我前表裏俱

非形至道此獨全凡民空歎妙日光眩四邊何不入其
無乃煩量測焉

重築朱家壩

壩自嘉靖閒唐一庵先生所築屏絕盜蹊扶立民志
數村煙火相賴殷盈壩圯之後千家不能存百知賢
者用心良得也余避亂此中數聞盜警同若孫渤斟
酌流泉挽回土脈二三遺老勦厥成功因作詩紀之
盜散復爲盜夙曾稱義師焚掠勿暫已酷烈仍當時蒙
影竄荒落猶懼或見知規度舊泉源曲畱而比之造夷
使其深數畝遂逶迤人家星向晨況又乏生資以茲希
鑒原倘能赦窮蠶野荻蔽簷端亂篠成疏籬雲來覺我

高鳥飛覺我遲悲憤外刪省性情中餉遺惟彼父老言
憶昔爲羣兒雞犬無斷聲沿流好門楣天氣發所懽收
穫各不疑信哉壩之力圯後村漸衰到晚生憂虞將夢
腹苦飢鄰里日他徙寥寥乃如斯豈其忘親戚戀安恐
禍隨故道旣云修終老當無危桃源是何物此地少別
離

力田作

日炙水入土亭午寸有餘良苗集于枯微情頗難舒恃
天匪勤農用地爲何如腳下走雲雷頭上明羲車功奮
鬼神出氣併元化攄新流鳴殷殷涼影生徐徐沈吟古
人後久若歸吾廬

題半月泉

山不必嵩岱水不必江湖幽異之所會真宰□□拘吾
嘗登惠山形勢與此俱靜涵給羣動構象人工麤仰分
太陰精凝以爲肌膚白雲一片下秋氣四野孤蒼蒼雲
爲根寂寂天無徒緬焉動深衷欲往尋寒樞

高原晚眺

雲霞如更曉羣岫無隱跡始知登歷妙未若此明畫憺
然協精想豈必眾所適宿鳥忽驚飛溪邊露危石石下
細泉鳴石上初月白氣象屢回惑憂心日相積千秋不
可招達人貴今夕杳杳難具論行行冀良覲

雜詩

我聞丁令威成仙復來歸故里松柏長故廬狐兔肥親
戚隨物化感念增噓歎回瞻島嶼閒方壺隔層暉雲華
曳八極靈維徑三圍日月無晦明天海青微微胡爲幻
今昨逐逐榮與衰機生世網密理用神明虧悲風起暮
哀木葉吹裳衣慷慨將何行淚下不可揮

灼灼芙蓉花生君綠池上依倚終九秋感君意所向霰
雪日夜零寒聲動帷帳賤妾閨中愁良人隴頭望隴頭
有流水嗚咽如妾音鸚鵡號能言不能言妾心歲月歛
已馳朱顏寧逮今攜手百年好一別憂相尋人生貴適
志聲利烏足淫彈箏酌芳醕毋爲坐沈吟

病瘧

瘡來寓我魂從湧泉涉崑崙寒潮捲江天氣渾剛風颯
颯飄情根風中劫火隨摧燔精出神入同一門六種震
動主宰談空說實徒煩冤理解中人不能靜夜半雲
歸月華醒

盜警

花開滿林誰能惜晨往城東夜還北餘生擾擾安所之
一夜春風不相識不相識花欲飛飛花繞枝日三帀盡
日花飛歸不歸

鑑堂禪師再來茗上

不知何所事坐便長莓苔茆草蓬偏穩泥塗竈獨煨嘗
隨雲共寄忽與月同來免得如鴉聚鐘催板又催

新詠寒山句畱題石壁閒五年纔一晤半晌又千山始
信住非住果然閒更閒可能重此別不改舊襟顏

喜子見北歸

誰復杜門深權衡古及今三年從輦轂一往轉蕭森石
有中堅性雲無空際心胡然吐光氣鬱鬱出疏林

子蘧抱疴詩以發之

尙不悔書傭翻鈔到夕春怪君旬日病類我一生慵枕
簞酬秋水茗香接曉鐘肯將新詠寄絕勝幾過從

考叔出臥龍編見示有贈

無計耽溪壑市廛聊寄身豈其師往哲猶復慕時倫漢
室將移祚隆中尙有人應憐此堅臥夢不到風塵

公挹新遷書屋

結屋先位置徑開仍敞間

尊公舊有敞間堂

無如此看月誰謂

非空山玉樹參差列瓊樓杳靄閒相期探祕笈朝往暮能還

城隅多古樹今盡入華林燕悔營他壘鶯疑過別岑既疏泉結韻復選石呈陰久矣甘淪落何當遇賞音

送姚榕似分憲嶺南

屢試艱危地何嘗見錯盤孫謀詒蔽芾

榕似王父天祐舊為粵令

受屏翰所慮今非昔無勞猛勝寬固窮期永矢莫更念

衣單

奔赴行在呈于越凡徐伯遠兩先生

五月江天濁浪衝
淒風急雨亂雲重
魂驚宮闕虛雙鳳
目斷烽煙遠六龍
多少大臣曾定鼎
有無宛馬竟乘墉
流離未忍言中露
祇向新亭一撫胸

西湖數峰閣拜兩朝忠烈祠

天教草莽獨趨蹌
祀典何勞紀太常
勉爾忠魂依俎豆
好畱遺像閱滄桑
湖山不改猶明聖
南北無歸此首陽
颯颯白楊風過處
于公墳畔共悲涼

于野發權白門同天行位存西帆分韻送之

送君那得有繁言
珍重陳詩一代存
但使寸心能許可
不妨千古絕攀援
衝帆海燕知風正
狎浪江豚觸暑渾
疏雨斜陽桃葉渡
何如吟好舊柴門

奉酬陳子皇士見懷之作

趙曲齊謳次第侵誰從正始重追尋
權衡不入時人手
刪定猶存作者心
白首長歌空擊劒
朱絃未絕尙橫琴
只今何事相關切
到處嚶嚶聽鳥音

霜回發婺州之櫂因念昔游幾經秋
暮江光歷歷
在眼願于登覽之餘采風命詩以當信史

舉目河山去住難行吟多半趁秋殘
黃蘆岸斷翻銀浪

烏柏霜初濯錦湍漫擬登臺唐慟哭

臯羽諱宋而曰故
人唐開府遂從之

好瞻垂釣漢衣冠經過幾許堪憑弔
八詠樓中補裨官

過西帆讀書處

尋君三月落花初正值溪頭看打魚
半榻低徊其奈雨

小舸沿泛未通渠直云汎愛非求友豈有違心是著書
肯向世人輕許可只今誰似馬相如

送表甥唐鴻之白門兼寄澹心余子

漫將往事付離樽六代誰支半壁存未必山靈依草木
猶然光氣變朝昏風騷舉世無他業月旦斯人有定論
但使賃春依廡下絕勝兀兀老丘園

和陳皇士四十自述

一枕羲皇似小年息來六月日悠然得肥絕好先

缺

同岑初集卷三